

Juan

Ese uje ir iich otsii Porrosht ahwoso tyenij shūrha hnakirap.

1 ¹Uje ehn yahpaa ĩrmo chihikite ich wichi de uje ir iich otsii Porrosht ahwoso. Wichi de Porrosht ahir hn wichi Porrosht. ²Uu ĩrmo tenitkite ich shish de Porrosht ahir. ³Wichi uje nos shiyokōr kuche. Kirēhe ye wichi niyokōr erze kuche ich nīhyok. ⁴Shi ire uje shuu ōr ikirīt de hn ese ōr ikirīt wichi uje shuu ochiraha Porrosht shi itso uje luu chihit ōr. ⁵Ese uje itso luu chihit erze oso uje ōr iluu mihnū pork wir shi ōr itso uje ode dihlelta hn asa dihlelta ye pwele nontew asa luupe.

⁶Eseekite hn Porrosht shuu hnakirbich uje iich otsii Juan sanimirāha lahwoso. ⁷Ese Juan uu tohirm oso tirēt tatim oso Cristo uje ire shi itso luu pork shuu oso ochiraha Porrosht par uje nos ye olotiis Cristope. ⁸Juan wichi ye asa luupe. Shi tatim oso uje Cristo wichi asa luu. ⁹Cristo tirēt t̄r nāhu ĩrmo par shuu ochiraha uje ich ũru. Tyenij shuu nos oso ōr pwele ochiraha Porrosht. ¹⁰Wichi shiyokōr ĩrmōkite. Uje tirēt t̄r nāhu ĩrmōni ich oso ye odiraha ĩrpe. ¹¹Wichi tirētni t̄r nanapso uu israel oso per wir ye onahmūr ĩrpe. ¹²Nos wir erze uje otsahmūr ĩre ich ye olotiis uje wichi Cristo heke shuu ōr pwele omasaha par Porrosht aabo. ¹³Wir ōr Porrosht aabo pork shuu oshūrhapo. Ye ōr Porrosht aabo shi pork ōr deych hn ōr data wir Porrosht aabo, hn ye ōr Porrosht aabo shi pork ochibite uje ōr Porrosht aabo, hn ye ōr Porrosht aabo shi pork yeēk tata uje ōr Porrosht aabo. Shi ōr Porrosht aabo pork Porrosht shuu oshūrhapo.

¹⁴Eseekite hn ese uje ir iich otsii Porrosht ahwoso shurhā iteētak hn debuhu eyok ahir. Shish sahmūr oso hn tata uje ich ũru. Oyumo ire uje ich hūre. Wichi Porrosht Ij̄it uje shi nohmira. Tāra ĩr Deych ahir. ¹⁵Juan uu tohirm oso tatim ōr Cristo ich sihnew im: —Ese uje titim olakni too: “Wichi uje iyehe piyēr ich ma dich je yok pork de wapkite ehn yok nīhyok.”— ¹⁶Cristo ich ĩhirk. Nos wir eyok uje eyok Porrosht aabo ich shish ĩshim eyok uje eyok nesita. ¹⁷Porrosht ĩshim Moisés ĩr ley par shuu ĩshim israel oso per shuu Jesucristo tirēt par sosir oso hn par shuu ochiraha uje ich ũru. ¹⁸Nīhyok yeēk uje umo Porrosht. Jesús wichi Porrosht Ij̄it pisht uje shi nohmira. Wichi uje tāra Porrosht ahir hn shuu oso ochiraha Porrosht iluu.

Juan uu tohirm oso tata uje Jesús wichi Cristo.

¹⁹Eseekite hn erze israel oso uje odechi Jerusalén uje ör iluu iich otsii fariseo ochiihla erze uje ör ibiyo iich otsii saserdote hn erze uje otāra ir porokkite Levi. Oshuu ohno otār Juan uu tohirm oso pork sehe odiraha kimiji wichi Cristo o keshi yeēkpo. ²⁰Wichi ye nehnyēr örpe. Tatim ör uje ich ūru im: —Ye yok Cristope.— ²¹Otatim ire otsii: —Kimiji ye owa Cristo ¿ich owa yeēkpo? ¿Je owa Elías?— Tatim ör im: —Ye yok Eliaspe.— Otatim otsii: —¿Je owa uu profetit uje Moisés tatkite uje tyenij tirēt nehe?— Tatim örpo im: —Ye yokpe.— ²²Otatimpo ire otsii: —¿Owa yeēkpo par uje oyitim erze uje oshuu oyirēt?— Otsii: —¿Hap owa, ebiitikih?—

²³Hn Juan tatim ör im: —Yok uje de ese hnimich uje isa tihnew pahwoso titim ör par onishii deluu shi itso uje onishii dehet par eyok fhrich shi itso uje profeta Isaías lishi tatkite.— ²⁴Erze oso uje ör iluu iich otsii fariseo wir uje oshuu erze hnakirbo ohno otār Juan. ²⁵Otatimpo otsii: —Kimiji ye owa Cristo hn ye owa Elías hn ye owa ese profeta ¿inaāpo heke ohirm oso?—

²⁶Juan tatim ör im: —Yok shi tokohirm oso onoota per yet de olak ahir uje ye erehelope. ²⁷Wichi tyenij tirēt nehe iyehe piyēr. Yok ye yok dichpe hni par uje tiyuhu ir erihyo atshūro.— ²⁸Wir otār okeytkēr Juan uje tohirm oso wahacha onoota Jordán pit yet deeych warich ye dukuhlehe ese dit Betaniape.

Jesús wichi shi itso Porrosht ir obejit.

²⁹Eseekite uje ich deychole hn Juan umo Jesús uje tirēt tār ire. Juan tatim oso im: —Hmeychimlo ese. Wichi shi itso Porrosht ir obejit uje tyenij tooho oso nehe hn ishi ör hnitewih Porrosht ahir. ³⁰Wichi uje titim olak too: “Tyenij yet tirēt iyehe piyēr. Wichi ma dich je yok pork ire de wapkite ehn yok nīhyok.” ³¹Wap ye tikiraha uje wichi Jesús uje iyehe piyēr. Shi yok itso olak uje ye erehelope. Yok Tikirētni par tokohirm oso par uje tuu wir erze israel oso ochiraha yeēkpo Jesús.—

³²Hn Juan tata im: —Tokomo ese Porrosht Ichibich uje ihnimich tāra poōrc shi itso palomit hn ihnimichih Jesús eeych hn sakaha. ³³Yok itspo, ye tikiraha yeēkpo ire per ese uje shuu tikirēt par tokohirm oso tatim yok im: “Ese uje eychim hn Porrosht Ichibich ihnimichih ir eeych hn ye tokolpe, wichi uje tyenij tohirm oso chāra Porrosht Ichibich, ye nāra awitpe.” ³⁴Tokomo ire uje Porrosht Ichibich ihnimichih ire eeych heke titim olak uje wichi uu Porrosht Ijīt.—

Jesús ir akile webich oso.

³⁵Eseekite uje dechole yet hn Juan dechi ese owichpo. Ir akile ör osiyer ōya ire. ³⁶Uje Jesús chikāhachis hn Juan teychim hn tatim dakile

im: —Wichi shi itso Porrosht ir obejit uje tyenij ishi oso òr hnitewihi Porrosht ahir nehe.— ³⁷Erze Juan ir akile uje òr osiyer ochunt uje tatim òr hn ohno oyehe Jesús nêr. ³⁸Jesús somtis ire hn teychim òr uje oyehe ire nêr. Tatim òr im: —¿Ekulo latikpo?— Hn òr ire otatim ire otsii: —Maestro, ¿shi akaha iraãpo?— ³⁹Tatim òr im: —Erêtlo eychimlo uje yok tiyakaha.— Ohno oteychim ese owich uje ire sakaha. Ich a la kwatro yilka uje otaachihichis hn otsakaha ire ahir nehech yilkaship.

⁴⁰Erze Juan ir akile uje òr osiyer uje ochunt uje Juan tataka hn oyehe Jesús nêr nohmet iich otsii Andrés, uu Simón Pedro ir leshibich. ⁴¹Hno chukwi leshibich hn tatim ire im: —Tishiki Mesías.— Ir iich yet otsii Cristo. ⁴²Heke Andrés hnoy leshibich seya uje Jesús de. Uje Jesús teychim ire hn tatim im: —Owa Simón uu Juan ir ijit. Tikëra owa Cefas.— Cefas otata otsii Pedro.

Jesús chiihla Felipe hn Natanael.

⁴³Eseekite uje ich dechole yet hn Jesús chibite par uje hno tîr wahacha hnimich Galilea. Chish Felipe hn tatim ire im: —Mëya yok.— ⁴⁴Ese Felipe tãra dit Betsaida. Andrés hn Pedro otãra wahacha toy. ⁴⁵Felipe hno par chukwi Natanael. Uje chish hn tatim ire im: —Oyishike uu hnakirbich uje Moisés chichew chibite ir hutekite hn uu profeta poruwo wishi ochichew ochibite ir hute. Wichi Jesús uu José ir ijit. Tãra wahacha dit Nazaret.— ⁴⁶Natanael tatim Felipe im: —Nîhyok ye latik uje ich om tokolihi ese dit Nazaret.— Felipe tatim ire im: —Erêt eychim par uje eraha.—

⁴⁷Uje Jesús umo Natanael uje taachîhi ire ahir hn tatim dakile im: —Hmeychimlo lika, liki israelyapa. Yelij nehnyër oso.— ⁴⁸Natanael tatim Jesús im: —¿Inaãpo heke eraha yok?— Jesús tatim ire im: —Uje ehn yahpaa Felipe tibii owa ichii tokomo owaha asa pohorrza uut waa je iich otsii higuera.— ⁴⁹Natanael tatim im: —Maestro, owa uu Porrosht Ijit hn owa uu israel oso òr rey.— ⁵⁰Jesús tatim ire im: —Shi pork titim owa uje tokomo owa asa pohorrza higuera uutike heke ye otiis uje yok uu Porrosht Ijit. Heke tyenij amo kuche nehe uje tiyokôr uje ich ma deyo.— ⁵¹Hn Jesús tatim ire im: —Titim owa ich tuu ürpa. Olak tyenij amilo poôrc uje sitsër ire hn Porrosht ir anjele oyhnimich hn otîr yok uje tokôra poôrzni hn ocheeshpo otîr poôrc.—

Oshiyokôr òr ahamich dit Caná.

2 ¹Eseekite uje ich terihi daalo tre hn yeëk chiilekuhu wahacha dit Caná uje dechi hnimich Galilea. Jesús ir data dechi. ²Otatim Jesús hn ir akile par uje otîr ese òr ahamich toy. ³Uje ehn yahpaa terihi ese òr ahamich uhurc ich wint yuwirke. Jesús ir data tatim ire im: —Ese wint ich yuwirke.— ⁴Jesús tatim data im: —Mama, ¿inaãpo heke atim yok

uho itsorz? Yahpaa terihi pishirĩtpe.— ⁵Ir data tatim erze uje odirkii oposo par oshim oso im: —Ahakõrlo uje wichi tatim olak.—

⁶Ese owich uje õr ire ode kobo de seys uje oshiyokõr ochĩra kojano par otsanuwãha awit hn ochũrhu kuche. Shi israel oso õr iluu itsorz. Kal erze kobo yewo sinkwenta litro hn yewo setenta litro uje awit de aho. ⁷Jesús tatim erze uje odirkii oposo im: —Eẽtlo erze kobo nehech nos uhulo yenpa.— Heke wir otseẽt erze kobo oshuu yeno. ⁸Jesús tatim õr im: —Eyuhulo pikaabit hn bolilo asimlo ese uje tibey õr ahamich par uje prowa wap.— Oshiyokõr uje ire tata. ⁹Ese uje tibey õr ahamich prowa ese awit uje chisãha ire wint. Ich ye diraha uje ese wint tãra. Shi erze uje odirkii oposo wir uje ochiraha pork wir uje ochiyuhu ese awit. Heke ese uje tibey õr ahamich tibii ese uje sehe diileku. ¹⁰Tatim ire im: —Nos wir oso uje oshiyokõr õr ahamich ich wap oshim õr ese wint uje ich ihĩrt. Uje nos oho kihniya ich oshim õr ese wint uje yẽrij om per owa ehmer ese wint uje ich ihĩrt hniĩ asim õr.— ¹¹Wichi uu kuchit webich osht uje Jesús shiyokõr uje ye latik pwele niyokõr. Shiyokorĩhi wahacha dit Caná uje dechi hnimich Galilea heke shuu imeheeych uje ire ich dich hn erze ir akile ye olotiĩ irpe.

¹²Uje ich yuwirke ese õr ahamich hn Jesús hno tĩr dit Capernaum. Ir data hn ir leshibo hn ir akile ohno õya ire hn otsakahachis oshuu daalo arhaabo.

Jesús chiyuhu erze uje ochiwãha kuche templo patikit eheth.

¹³Eseekite uje ich yej terihi erze israel oso õr ahamich uje iich otsii Pascua hn Jesús hno tĩr Jerusalén. ¹⁴Uje masaha asa templo patikit eheth hn umo erze oso uje ochiwãha wõjo, obeje, hn paloma. Umo toy erze uje otsakaha nemest wiric par oshuu hnote kambya. ¹⁵Uje Jesús umo õr hn shiyokõr shikote chĩra lukweriyo hn nos shuu otokolihĩ templo patikit eheth erze oso uje ochiwãha kuche hn erze obeje hn wõjo ãya õr. Hno tĩr erze uje oshuu hnote kambya hn sitsẽr erze õr hnote shuu chũr lekĩtiyo hn sehnimich erze õr nemesa ¹⁶hn tatim erze uje ochiwãha paloma im: —Eyuhulo erze paloma. Ye uhulo ele Papa ihyuch ilo uje ochiwãha kuche.— ¹⁷Ir akile õr eyucha uje Porrosht ahwoso tata: —Cristo tatim Porrosht im: “Yok tarhãk ahuch nehech shuu oshuu yok oshuu tikiti.”—

¹⁸Erze israel oso otatim Jesús otsii: —¿Yarirãha uje owa õryok par uje oyiraha uje akirbo de par eyuhu erze uje ochiwãha kuchehe lika?— ¹⁹Jesús tatim õr im: —Kĩmĩji ehnilo asa templo per je daalo tre nehe hn tuu iyehetpo.— ²⁰Erze israel oso otatim Jesús otsii: —Ich kwarenta y seys ãyo uje oyishew obiyo oiyokõr asa templo per owa atha uje shi daalo tre hn uhu iyehetpo. Ye owa pwelpe uje ahakõr uhu itsorz.— ²¹Per asa templo shi Jesús siteẽta neyũhurrza. ²²Uje Jesús ikpo tokolihĩ erze topo õr ahir hn erze ir akile õr eyucha uje tatkite hn ye olotiĩspe uje Porrosht ahwoso tata hn erze ahwoso uje Jesús tata.

Jesús nos chiraha oso òr iluu.

²³Eseekite uje ehn Jesús de wahacha Jerusalén uje oshiyokorîhi òr ahamich uje iich otsii Pascua ich okîhniya uje ye olotiis irpe pork omo erze yar uje ire shiyokòr uje ye latik pwele niyokòr. ²⁴Per Jesús toloho òr ²⁵pork nos chiraha oso òr iluu. Ye nesitpe uje yeèk tatim ire oso òr iluu. Ire nos chiraha.

Nicodemo tekirihi Jesús.

3 ¹Eseekite hn hnakirbich de uje iich otsii Nicodemo. Ir iluuta iich otsii fariseo. Wichî israel oso òr bahuwa toy. ²Uje dîhlak hn wichî hno tekirihi Jesús. Tatim Jesús im: —Maestro, oyiraha uje Porrosht shuu erèt par ahakorâha oso pork nîhyok yeèk shiyokòr erze kuche uje owa ahakòr kimiji Porrosht ye takashim ire.— ³Jesús tatim im: —Titim owa ich tuu ùrpa. Uje yeèk ye shurhâpo ich ye teychim ese owich uje Porrosht aabo otîr nehe.— ⁴Nicodemo tatim Jesús im: —Nîhyok yeèk uje ich ilaro hn shurhâpo. ¿Je yeèk pwele cheeshpo masaha data ehèt par shurhâpo? Nîhyok.—

⁵Jesús tatim im: —Titim owa ich tuu ùrpa. Kal yeèk uje shûrha ich hopta tokole hn awit îya, per tyenij Porrosht Ichîbich shuu shurhâpo par uje pwele taachîhi Porrosht ahîr nehe. ⁶Uje yeèk shûrha ich shî itso oso yewo, ye kinâhape, per ese uje Porrosht Ichîbich shuu shurhâ ich ir ikîrît de uje yelij nihna ire. ⁷Ye as abe uje titim owaka uje nos tyenij oshûrhapo. ⁸Uje myentita tibichu shî ent uje de per ye eraha uje târa hn ye eraha uje tîr. Shî itso erze uje Porrosht Ichîbich shuu oshûrhapo. Ye odîraha uje wichî shiyokorîhi òr aho par shuu oshûrhapo.—

⁹Nicodemo tatim Jesús im: —¿Porrosht Ichîbich duhu inaâpo uje shuu oshûrhapo?— ¹⁰Jesús tatim im: —Owa israel oso òr maestro. ¿Inaâpo heke ye erehepe uje itsorz? ¹¹Titim owa ich tuu ùrpa. Oyiita uje oyiraha hn uje oyumo, per olak otiislo uje oyitim olak. ¹²Titim olakni ahnûwo kuche uje de nâhu îrmo per otiislo yok heke ma otiislo yok kimiji titim olak kuche uje de wahacha poòrc. ¹³Nîhyok yeèk uje hno tîr poòrc, shî yok uje tokòra poòrznî hn tikihnimich, hn tyenij takaha titîr poòrzo. ¹⁴Shî itso uje Moisés seem ese echeèt ichîbichkîte wahacha ese hnîmich uje isa ich tyenij ochowish yok pork yok tokòra poòrznî ¹⁵par uje nos wir oso uje ye olotiis yok ich òr ikîrît de uje yelij nihna ire.—

Porrosht sahmûr pishi oso.

¹⁶Eseekite hn Porrosht ich sahmûr pishi oso uje ode nâhu îrmo heke shuu Deyjît tirètkite uje shî nohmîra par uje nos wir uje ye olotiis ire ich ye otîr urhuta bahluta ehèt nehe. Shî òr ikîrît de uje yelij nihna ire. ¹⁷Porrosht shuu Deyjît tirètkite ye par uje dîbite oso urhuta bahluta ehètpe. Shî shuu tirèt par

sosir òr hn shuu òr ikirít de uje yelij nihna ire. ¹⁸Ese uje ye lotiis Porrosht Ijítpe ich ye tír urhuta bahluta ehete nehe, per Porrosht chibítkite uje erze yewo tyenij otír urhuta bahluta ehete nehe pork otsotiis ir Ijít uje shi nohmira. ¹⁹Jesús wichi shi itso luu uje tirét tír nāhu irmókite per erze oso ich ma otsahmūr erze uje ich mihñūwo shi itso uje ode dihlelta heke tyenij otír urhuta bahluta ehete nehe. ²⁰Nos wir erze uje oshiyokōr uje ich mihñūwo otsitak ese uje itso luu. Wir ye odítír ire asa luupe pork kimiji otír ire ich chibíte orhōta uje oshiyokōr mihñūwo, ²¹per nos wir uje oshiyokōr uje ich om otsítír ire ese uje itso luu par nos chibíte orhōta erze kuche uje òr ire oshiyokōr wir uje Porrosht sahmūr.

Jesús ir akile otohirm oso

²²Eseekite hn Jesús hōr dakile ohno otír wahacha hñimich Judea. Uje ehn otsakaha wahacha hn otohirm oso. ²³Juan dechi hñimich Enón hn tohirm osohochis toy pork ese hñimich Enón ich onoo kihniya de. Wichi ich ye dukuhlehechispe ese dít Salim. Erze oso ohno otír ese owich hn otohirm oríhichis. ²⁴Ich shish Juan tohirm oso pork ehn yahpaa onimchaha karsel ehetepe.

²⁵Eseekite hn Juan ir akile hōr ese israel osht oshiyokosye uje yeēkpo ma om par tohirm oso. ²⁶Ohno otír Juan otsii: —Maestro, ese uje iyehe ahírni wahacha onoota Jordán pít uje athani uje wichi shi itso Porrosht ir obejít, ele ahle wichi yesh tohirm oso hn nos otír ire.—

²⁷Juan tatim òr im: —Níhyok uje yeēk pwele shiyokōr erze obiyo kimiji Porrosht ye dosim ire. ²⁸Olak itspo entlo uje titim yewo uje ye yok Cristope. Shi Porrosht shuu Tikirētni tiyebe par tiyokōr erze obiyo. ²⁹Uje sehe yeēk diileku ich asa ir ihyāta shi par ire hn ese hñakirbich ir ihyēt uje chunt òr ahwoso ich aylpa. Ese hñakirbich wichi Cristo hn ir ihyāta wir Porrosht aabo hn ir ihyēt wichi yok, heke ele ahle ich yok aylpa pork oso otír ire. ³⁰Jesús ich shish ma dich hn yok pukurbo ich shish ma iñimich.

³¹Ese uje tirētni tāra poōrc wichi ma dich je nos wir oso. Yeēk uje shi de nāhu írmo wichi shi írmo os heke shi tata erze kuche uje de nāhu írmo, per ese uje tāra poōrzní ma dich je nos wir oso. ³²Jesús wichi tāra poōrzní. Tata uje chunt hn uje umo per nos otsotiis erze uje ire tata. ³³Uje yeēk ye lotiis ir ahwoso ich chibíte orhōta uje Porrosht tata ich ūru. ³⁴Porrosht shuu Jesús tirētni. Ire tatim oso erze kuche uje Porrosht tata pork Porrosht ishím Dechibich hn nos wir ukurbo. ³⁵Porrosht ich sahmūr Deyjít heke chibíte nos wir kuche ir hme. ³⁶Ese uje ye lotiis Porrosht Ijít ich ir ikirít de uje yelij nihna ire, per ese uje ye niyokōrpe uje Porrosht Ijít tata ich níhyok ir ikirít. Porrosht sitak pishi wichi.—

Jesús hōr samaria otita okeytkērye.

4 ¹Eseekite hn Jesús chunt uje erze uje òr iluu iich otsii fariseo ochiraha uje ire tohirm oso par ir akile ich ma okihniya je Juan

uu tohirm oso. ²Jesús ye tohirm osope, shi ir akile wir uje otohirm oso. ³Uje Jesús chunt uje erze fariseo ochiraha itsorz hn tokolíhichis hnimich Judea par hno t̄ir hnimich Galilea.

⁴Par hno t̄ir Galilea ich chikāha erze samaria oso ōr hnimich ehēt. ⁵Chikāhachis nehech taachīhi ese d̄it uje iich otsii Sicar. Ese d̄it ye dukuhlehechispe ese hnimich uje Jacob ishim deyjit Josekite. ⁶Jotsit dechi uje Jacob shuu ochihitsakite. Jesús ich chirmtsir pork ese uje t̄ir ich dukuhla, heke sakahachis jotsit wir. Ich yej terihi deeych pehet.

⁷Eseekite hn timcharrza samaria yār t̄irēt t̄ir ese jotsit par uje chiyuhu awit. Jesús tatim wate im: —Asim yok tokoho.— ⁸Jesús ir akile ich ye ochihi ir ahirpe. Ohno ot̄ir ese d̄it par otiya oposo par otew. ⁹Asa timcharrza tatim Jesús im: —Owa israelya hn yok samaria yār. ¿Inaāpo heke sehe uhu tokosim owa awit? Erze israel oso hn erze samaria oso shish otsitakye.—

¹⁰Jesús tatim wate im: —Kimiji eraha ese uje Porrosht sehe dosim oso hn kimiji eraha yok yeēkpo uje tapur owa awit ich apur yok hn tokosim owa ese awit uje shuu ōr ikir̄it de uje yelij nihna ire.— ¹¹Asa timcharrza tatim Jesús im: —Irhīche, ich jotsakpa ese jotsit. Ye owa kuchēr̄k chihipe par eyuhu ese awit. ¿Uhu tāra iraāpo ese awit uje shuu ōr ikir̄it de par asim yok?— ¹²Hn tatim Jesús im: —Ōryok porokkite Jacob ishim ōryok ele jotsit. Ire ihi ele awit hn nos wir ir aabo oho toy hn nos wir ir echiyo. ¿Je owa ma dich je Jacob?—

¹³Jesús tatim asa timcharrza im: —Nos wir uje oho ese awit uje tāra ele jotsit ich shish ōr iich sēhi ōrpo, ¹⁴mahn erze uje oho ele awit uje yok tokosim ōr ich yelij ōr iich nēhi ōrpo. Ese awit ich ye uhurtikish, shish de ōr aho hn shuu ōr ikir̄it de uje yelij nihna ire.— ¹⁵Asa timcharrza tatim Jesús im: —Irhīche, sehe tuu asim yok ese awit par tokoho par uje ye piich nēhi yokpo hn par uje ye takaashpo tit̄ir ele jotsit hn tiyuhu awit.— ¹⁶Jesús tatim im: —Bo ōhwa abich hn eeshpo.— ¹⁷Asa timcharrza tatim Jesús im: —Nīhyok ye pabīrkish.— Jesús tatim im: —Ich ūru uje atim yok uje ye abīrkish ¹⁸pork owa abiyo odeni ōr sinko hn ese uje yesh de ahir wichi ye abich pishtpe. Ich ūru uje atim yok uhu itsorz.—

¹⁹Uje asa timcharrza chunt uje Jesús tatim ire shuu itsorz hn tatim im: —Irhīche, ele ahle ich tikiraha uje owa profetya. ²⁰Ōryok poruwo wishi oteeychāha Porrosht ele kojach eeych per olak uje olak israel oso shish athilo uje Jerusalén wichi owich uje nos tyenij oteeychāha Porroshtīhi.— ²¹Jesús tatim asa timcharrza im: —Ye otiis yok uje titim owa uje deeych yet nehe owa hn eeyso ich ye eeychāhalo Porroshtīhi ele kojach eeych hnii wahacha Jerusalén. ²²Olak samaria oso ye erahalope yeēkpo ese uje eeychāhalo. Ōryok israel oso oyiraha ese uje oyeeychāha pork ese uje ishi ōr hnitewih̄i Porrosht ahir nehe shi tāra erze israel oso. ²³Ele ahle ich terihi ishir̄it erze uje oteeychāha pishi Porrosht ich otsināha

ire hn otata uje ich ũru pork Porrosht chukwi erze uje oshiyokōr oshuu itsorz. ²⁴Porrosht wichi ichibich heke erze uje oteeychāha pishi ire ich otsināha ire hn otata uje ich ũru hn Porrosht Ichibich takashim ōr.—

²⁵Asa timcharrza tatim im: —Tikiraha uje Mesías tyenij taācha nehe. Ir iich yet otsii Cristo. Uje taācha nehe ich nos tatim ōryok erze kuche par oyiraha.— ²⁶Jesús tatim wate im: —Wichi yok uje yesh tikitkēr owa.—

²⁷Eseekite hn Jesús ir akile otaācha. Ich ochishlabe uje Jesús keytkēr timcharrza nohmata per ye otatim Jesús uje asa timcharrza ¿duhu inaāpoko? hn ye otatimpe uje ¿inaāpo heke keytkēr asa timcharrza?

²⁸Asa timcharrza iim ese deybīt hn hno tīr dit. Tatim oso im: ²⁹—Yukulo eychimlo ese hnakirbich. Nos tatim yok uje tiyokōrni. ¿Je wichi Cristo?—

³⁰Heke otokolihī ese dit ohno otīr uje Jesús de.

³¹Eseekite uje ehn erze oso otirēt hn erze ir akile otatim Jesús otsii:

—Maestro, aak.— ³²Per tatim ōr im: —Kuchērk de uje taw uje ye erehelope.—

³³Erze ir akile otatimye otsii: —¿Je yeēk tōhwa posoko par uje tew?— ³⁴Jesús tatim ōr im: —Porrosht shuu Tikirētni. Sehe nos tiyokōr erze uje sahmūr hn timīt ir ibiyo. Wir shi itso pobiso. ³⁵Olak shish athilo uje ich yej terihī shekurko kwatro uje ochekushu jōro nehe.

Per titimolak too: “Hmeychīmlo erze jōro, ich de par ochekushu.” ³⁶Ese uje chekushu erze jōro ee ich oshi ire pork shiyokōr itso uje chiish oso ōrye shuu otakisho lawich nohmet par uje ōr ikirīt de uje yelij nihna ire.

Ese uje tatim oso Cristo wichi shi itso uje chukwēr jōro hn ese uje chekushu wichi shi itso uje shuu oso omasaha par Porrosht aabo heke ese uje chukwēr hn ese uje chekushu ich ōr aylpa. ³⁷Ich ũru uje oso otata oshuu itsorz: “Yet de uje chukwēr hn yet de uje chekushu.” ³⁸Tuu bolilo par ekushulo erze uje ye ekwēlope. Yewo otsanimirāha otatim oso yok shi itso uje ochukwēr jōro hn olak ekushulo uje wir ochukwēr.—

³⁹Eseekite hn erze samaria oso uje odebuhu ese dit ich okihniya uje ye olotiis Jesuspe pork ochunt uje asa timcharrza tatim ōr im: —Jesús nos tatim yok erze kuche uje tiyokōr.—

⁴⁰Heke uje erze samaria oso otaachihī Jesús ahir hn otsapur ire par uje sakaha ōr ahir. Ich sakaha ōr ahir shuu daalo osiyer. ⁴¹Uje ochunt Jesús ir ahwoso ich ma okihniya uje ye olotiis irpe. ⁴²Otatim asa timcharrza otsii: —Ele ahle ich ye shi erze ahwoso uje atim oryōkike uje shuu ye oyotiis Jesuspe. Oyunt ir ahwoso toy heke oyiraha uje ich ũru uje wichi uje tyenij ishi oso ōr hñitewihī Porrosht ahir nehe.—

Jesús chukuta ōr bahlut ir ijit.

⁴³Eseekite uje ich iyuwe daalo osiyer hn Jesús tokolihichis samaria oso ōr hñimich hn hno tīr Galilea. ⁴⁴Jesús tatim oso im: —Erze ir ihnapso uje ode ese owich uje profetit tāra ich ye otola irpe.— ⁴⁵Uje Jesús taachihī Galilea ich erze oso otsahmūr ire pork wir ode ese ōr ahamich uje iich

otsii Pascua wahacha Jerusalenhna hn oteychim erze kuche uje Jesús shiyokorñhi wahacha.

⁴⁶Eseekite hn Jesús taachihipo ese dit Caná uje de hnimich Galilea. Wichí ese dit uje Jesús shuu awit chisāha ire wintni. Eseekite hn òr bahlut dechi dit Capernaum uje ir ijit permo. ⁴⁷Ese òr bahlut chunt uje Jesús tokolihi Judea hn taachihi Galilea heke hno tñr Jesús par sapur par uje sehe duhu do tñr dahuch hn dukuta ir ijit pork ich yej toy. ⁴⁸Heke Jesús tatim im: —Shi sehe uhulo tiyokòr kuche uje ye latik pwele niyokòr par uje tibite orhòta uje pukurbo de. Kimiji ye tiyokòr ich shish otiislo yok.— ⁴⁹Ese òr bahlut tatim im: —Irhìche, erèt shichish pork pijit ich yej toy.— ⁵⁰Jesús tatim im: —Bo eyhi etñr ahuch. Eyjit ich ye tope.— Ese òr bahlut ye lotiispe uje Jesús tatim hn hno seyhi.

⁵¹Uje ehn hno cheeshpo tñr dahuch hn ir ìbiyo ochishihi dehet pehet. Otatim otsii: —Eyjit ich owich omike.— ⁵²Tatim erze debiyo im: —¿Latik orahna ich owich om?— Otatim ire otsii: —A la una yilkahna ich ir aat ye duhlpe.— ⁵³Ese pikihnint ir deych chiraha uje wate asa orta uje Jesús tatim ire uje ye ir ijit tope heke ire hn nos wir ir iiso ye olotiis Jesuspe. ⁵⁴Uje Jesús chukuta ese pikihnint ich shiyokòr yarta yata uje iyehe asa webich otita nër uje chisāha awit wint. Uje tokolihi Judea hn tñr Galilea ich shiyokòr erze yar.

Hnakirbich uje pilich worbit yakaha.

5 ¹Eseekite hn israel oso oshiyokòr òr ahamichpo wahacha Jerusalén hn Jesús hno tñr. ²Ese Jerusalén moraylt chipeesa hn ir uhur kihniya de. Waa uhurza nohmata iich otsii obeje. Asa uhurza ye dukuhlehe ese tejmanpe. Uu israel oso òr ahwoso iich otsii hebreo. Wir ochikera ese tejman iich otsii Betzata. Pwerto dechi sinko tejman wirc par puuruwo. ³Erze puuruwo uulo ich oso okihniya ode uje òr permo. Ode uje òr olibo, hn ode uje pilich worbit yakaha òr, hn ode uje ye òr pwele odirkpe. Oyem uje ese awit telerrza. ⁴(Kal uje terihi uje Irhìch ir anjel ihnimichihichis hn shuu ese awit telerrza hn yeèk uje webich os masaha ese awit ich shuu owich om.) ⁵Hnakirbich dechi erze oso òr ahir, treynta y ocho āyo uje permo. ⁶Uje Jesús teychim hn chiraha uje osdeyo dechi hnimich shi tihnim hn tatim im: —¿Je sehe uhu owa owich om?— ⁷Ese uje permo tatim im: —Irhìche, nìhyok yeèk uje seya yok ese awit uje telerrza. Kal uje sehe tomsaha ich yet de uje masaha wap hn serz yok.— ⁸Jesús tatim im: —Alehet. Asew ese etèch uje amuhu eeych hn bo.—

⁹Uje Jesús tatim shuu itsorz ich ese hnakirbich owich om. Seem ese detèch uje umuhu eeych hn hno dirk. Ese deeych uje Jesús chukuta ire wichi deeych uje otsakir, ¹⁰heke erze israel oso òr bahuwo otatim ese hnakirbich uje owich omike otsii: —Ele deeych wichi uje otsakir. Aluwe ley uje boy ese etèch uje amuhu eeych.— ¹¹Ese hnakirbich tatim òr im:

—Ese uje shuu yok owich omike wichi uje tatim yok par shuu tipaãsho uje tukumũhu eeych hn takaha.— ¹²Erze oso òr bahlwo otatim otsii: —¿Yeẽkpo ese uje tatim owa par epaãsho ese uje amuhu eeych hn bo?— ¹³Per ese hnakirbich ye diraha yeẽkpo uje shuu ire owich omike pork ich oso okihniya uje odechi tejman wirc hn shi Jesús tokolihi òr eheth hn hno.

¹⁴Deeych yet hn Jesús chishihi wahacha templo patikit eheth hn Jesús tatim im: —Hmeychim, ich owa owich om. Ich ye ahakõrpo uje ich mihnuwo par uje ye kuchit mihnt tĩr owa nehe uje ich ma mihnik je ese uje tĩr owani.—

¹⁵Ese hnakirbich hno tatim erze israel oso òr bahlwo uje wichi Jesús uje chukuta irhna, ¹⁶heke erze israel oso òr bahlwo ochukwi Jesús iluu shi pork chukuta ese hnakirbich ese deeych uje otsakir. ¹⁷Jesús tatim òr im: —Papa shish chishew obiyo hn yok ir Ijit heke tish obiyo itso ire. ¹⁸Erze israel oso òr bahlwo ich ma otsitak Jesús. Sehe oduhu oduhu toy ye shi pork chish obiyo ese deeych uje otsakir per tata toy uje Porrosht wichi uu ir Deych. Uje tata shuu itsorz ich chibite uje ire itso Porrosht.—

¹⁹Jesús tatim òr im: —Titim olak ich tuu ùrpa. Yok uu Porrosht ir Ijit. Ye yok pwele tiyokõr uje shi tahmũr. Shi tiyokõr uje takachim uje Papa shiyokõr. Nos wir kuche uje Papa shiyokõr ich tiyokõr toy.— ²⁰Hn Jesús tatim erze òr bahlwo im: —Papa sahmũr yok hn nos sowa yok erze kuche uje ire shiyokõr hn tyenij sowa yok kuche yewo toy nehe uje ich ma deyo je erze uje sowa yokike. Uje tiyokõr nehe ich as olak ibe. ²¹Papa shuu oso òr ikpo hn ishĩm òr ikirĩt, heke tyenij tiyokõr tuu yok itso ire nehe. Shi erze uje sehe tokosim òr ikirĩt ich tokosim òr. ²²Papa ye depyẽr yeẽkpe pork chibite yok par jwe par uje nos tepyẽr oso ²³par uje nos shuu otola yok shi itso uje otola Porrosht. Uje yeẽk ye tola yok ich ye tola Porrosht toy pork wichi uje shuu Tikirẽtni.—

²⁴Hn Jesús tatim òr im: —Titim olak ich tuu ùrpa. Uje yeẽk tẽr hn sahmũr erze uje tiita hn ye lotiis ese uje shuu Tikirẽtni ich ir ikirĩt de uje yelij nihna ire. Wichi ye tyenij iyehe pikich nehe par uje tepyẽr ire pork ir owich ye chihĩ urhuta bahluta ehethpe. Ir owich de wir òr ahĩr erze uje òr ikirĩt de uje yelij nihna ire.— ²⁵Hn Jesús tatim òr im: —Titim olak ich tuu ùrpa. Yok uu Porrosht Ijit. Ich yej terihĩ ishĩrĩt uje nos oso ochunt pahwoso. Wir òr itso topo pork ye odiraha Porroshtpe. Kimijĩ onahmũr ich òr ikirĩt de uje yelij nihna ire. ²⁶Papa ir ikirĩt de uje yelij nihna ire. Wichi ishĩm yok pikirĩt itso ire ²⁷hn chibite yok par jwe par uje oso otirẽt oyehe pikich hn tepyẽr òr pork yok tokõra poõrznĩ.

²⁸Ye uhulo pahwoso duhu as olak ibe pork uje terihĩ ishĩrĩt nehe ich nos wir topo ochunt pahwoso.— ²⁹Hn Jesús tatim òr im: —Erze uje oshiyokõr uje ich om ich tyenij òr ikpo nehe otokolihĩ dukuta hn otĩr ese owich uje òr ikirĩt de uje ich om per erze uje oshiyokõr uje ich mihnuwo ich tyenij òr ikpo nehe otokolihĩ dukuta hn tyenij oyehe pikich par

tepyēr ōr. ³⁰Ye tepyēr ōr tuu itso uje yok tahmūr. Shi tepyēr tuu itso uje Papa tatim yok, heke erze uje titim ōr ich ūru pork ye tiyokōrpe uje yok tahmūr. Shi tiyokōr uje Papa sahmūr pork wichì uje shuu Tikirētni.—

³¹Hn Jesús tatim ōr im: —Kimiji shì yok uje titim olak yeēkpo yok ich pahwoso ye jukur. ³²Yet de uje tata yeēkpo yok hn tikiraha ir ahwoso uje eyucha yok ich ūru. ³³Olak uje uhulo yewo ohnoni otīr Juan uu tohirm oso. Wichì tatim ōr yeēkpo yok hn tatim ōr uje ich ūru. ³⁴Par yok ich ma om uje Porrosht tatim yewo yeēkpo yok, ye uje hnakirbich tatim yewope yeēkpo yok. Shi titim olak uje Juan tatni par uje ye otiislo yok par uje olak owich de Porrosht ahir. ³⁵Juan uu tohirm oso ir ahwoso ich ūru. Tatim olak uje Porrosht sehe duhu ahakōrlo. Ir ahwoso ich shì itso nampyont uje chihit hn shuu erahalo dehet. Ich ahmūrlo ir ahwoso per shì daalo arhaabo hn moymlopo.

³⁶Juan uu tohirm oso tatim olak uje Porrosht shuu tikirēt. Erze kuche uje Porrosht shuu tiyokōr uje ye latik pwele niyokōr wir ich ma chibite orhōta uje Papa shuu tikirēt. ³⁷Papa wichì uje shuu Tikirētni hn wichì chibite orhōta uje shuu tikirēt. Yelij entilo ir ahwoso hn yelij amlō ire. ³⁸Ye ahmūrlo uje ahakōrlo ir ahwoso pork otiislo uje Papa shuu Tikirētni.— ³⁹Hn Jesús tatim ōr im: —Shish olak ler Porrosht ahwoso pork ebitilo uje olak ler ich shuu olak ikirīt de uje yelij nihna ire per ir ahwoso shì tata yok. ⁴⁰Shì yok uje tokosim oso ōr ikirīt per olak shish otiislo yok.

⁴¹Ye tuu oso onarim yokpe, shì sehe tuu Porrosht narim yok.— ⁴²Hn Jesús tatim ōr im: —Tikiraha uje ye ahmūrlo Porroshtpe. ⁴³Porrosht shuu Tikirētni per olak ye ahmūrlo yokpe, per kimiji yeēk chihì uje shì ire tirēt, nīhyok yeēk uje shuu tirēt, ich ahmūrlo ire. ⁴⁴Olak shish otiislo yok pork shish sehe uhulo yeēk narim olak hn ye ahakōrlope uje om par uje Porrosht narim olak. ⁴⁵Ye uhu olak eyuwo tisīr uje yok denunsya olakihì Papa ile ikich nehe. Ese uje denunsya olak nehe wichì Moisés. Wichì uje ebitloni uje tyenij takashim olak.— ⁴⁶Kimiji ye otiislo uje Moisés tata ich ye otiislope uje titim olak pork Moisés shì eyucha yok uje chichew chibite hutekite. ⁴⁷Uje otiislo erze uje ire chichew chibite hute heke shish otiislo pahwoso toy. —Wir uje Jesús tatim erze israel oso ōr bahuwo.

Jesús ishim oso uje ōr sinko mil ōr poso.

6 ¹Eseekite hn Jesús hno tīr wahacha lagunta pīt yet. Asa lagunta ir iich otsii Galilea hn ir iich yet otsii Tiberias. ²Ich oso okihniya uje otsan ire ijich pork omo uje shiyokōr kuche uje ye latik pwele niyokōr uje chukuta erze uje ōr permo. ³Jesús dohir wīrit eeych hn sakahachis hōr wir dakile. ⁴Ich yej terihì erze israel oso ōr ahamich uje iich otsii Pascua. ⁵Jesús seem deheta hn umo oso ich okihniya uje otirēt otīr ire heke tatim Felipe im: —¿Yiya oposoho irāāpo par ahnūwo oso otew?— ⁶Tatim ire

shuu itsorz shi par uje prowa Felipe pork sehe tēr uje Felipe tata per Jesús chiraha uje tyenij shiyokōr. ⁷Felipe tatim Jesús im: —Kimiji hnakirbich dishew obiyo daalo dosiento ich ir hnote kihniya per shi iyehi par tiya pan par nos wir erze oso otew pikaabo.— ⁸Jesús ir akilt yet iich otsii Andrés. Wichi Simón Pedro ir leshap. Tatim Jesús im: ⁹—Pikihnint de lika uje pan de ahir sinko uje oshiyokōr ochīra cebada. Wichi itso erint, hn doshiyo osiyer de toy per zyuhu inaāpo pork oso ich okihnipa?—

¹⁰Jesús tatim dakile im: —Atimlo erze oso uhulo olakir.— Ese owich uje otsakaha ihnemich de. Erze hnakirbo uje odechi ōr sinko mil.

¹¹Jesús chishew erze pan, nihna Porrosht, sehek hn ishīm erze dakile par shuu oshīm erze oso uje otsakir. Chishew erze doshiyo toy shuu itso uje shiyokōrke, nihna Porrosht hn ishīm dakile par shuu oshīm erze oso. Nos oshīm ōr uje otsahmūr. Otew nehech otsatso. ¹²Uje nos otsatsoko hn Jesús tatim dakile im: —Eshilo erze oposye uje otsatsoko par uje ye latik pyerte.— ¹³Ochishye nehech oshuu kanaste deyo yeno dose erze pan paho uje oso oshiyokōr ochīra cebada. Wap shi pan sinko uje de.

¹⁴Eseekite uje erze oso omo erze kuche uje Jesús shiyokōr uje ye latik pwele niyokōr hn otatimye otsii: —Liki profetya uje yesh yiyem uje tyenij tīr nāhu īrmo.— ¹⁵Jesús kemihī uje erze oso sehe odishew ire par oshuu masaha par rey heke tokolihi erze oso ōr ehēt hn hno dohir kojach, shi ire nohmira.

Jesús dirkihi awit eeych.

¹⁶Eseekite uje ich yilkaship hn Jesús ir akile ohno otīr wahacha lagunta wir ¹⁷oyāha pohorrhichichis ichii ohno otīr onoota pīt yet wahacha Capernaum. Ich dihlak, ehn yahpaa Jesús taachīhi ōr ahirpe. ¹⁸Myentita chish orīhi dehet pehet ich jwertpa, shuu asa onoota wokor deyo. ¹⁹Uje ohno shi ochīra remo kimiji sinko kilometro o kimiji seys hn omo Jesús uje dirkihi awit eeych. Sitīr ire asa pohorrza heke ich otolpa ²⁰Jesús tatim ōr im: —Yok, ye atililo.— ²¹Uje ochunt itsorz ich ōr aylpa hn oshuu dohir asa pohorrza ehēt. Uje dohir ehēt ichii otaachīhi onoota wir. Wichi ese owich uje sehe otīr.

Oso ochukwi Jesús.

²²Eseekite uje ich dihirbit hn erze oso uje ode wahacha lagunta pīt yet ōr eyucha Jesús ir akile uje oyāha asa pohorrhahna waa je shi sohmira dechi. Jesús niyokīhi ōr ahir uje otokole ohno. ²³Wisik wisik hn pohir yēr taachīhichis tāra wahacha dit Tiberias. Erze pohir iyehe owich uje ye dukuhlehechispe ese owich yet uje eyok Irhīch chishew panhna, nihna Porrosht hn ishīm erze oso par uje otew. ²⁴Uje erze oso ochiraha uje Jesús ye chihichispe hnii erze ir akile heke oyāha erze pohir hn ohno otīr Capernaum par ochukwi Jesús.

Jesús shi itso pan.

²⁵Eseekite uje otaachĩhi wahacha lagunta pit yet hn ochish Jesús. Otatim ire otsii: —Maestro, ¿latikhna hn aachĩhi lika?— ²⁶Jesús tatim òr im: —Titim olak ich tuu ùrpa. Tiyokòrhna erze uje ye latik pwele niyokòr par uje tuu erahalo yok per ye erahalo yokpe. Shi ekwilo yok pork elilo erze pan nehech atsilo. ²⁷Ye shi aslo obiyo par erze poso uje shi sihna ire shichish. Aslo obiyo par ese uje itso oposo uje pwele ishim olak ikirít uje yelij nihna ire. Yok tokòra poòrznì heke yok itso erze oposo uje ishim olak ikirít. Shi Papa wichi uje ishim yok pukurbo par tiyokòr kuche.—

²⁸Otatim otsii: —¿Oyuhu inaäpo par uje oyiyokòr ese Porrosht ibiyo uje atim oryòkike?— ²⁹Jesús tatim òr im: —Ese uje Porrosht sehe duhu ahakòrlo wichi uje ye otiislo yok pork Porrosht wichi uje shuu Tikirètni.— ³⁰Otatim otsii: —¿Yariräha uje owa òryok par oyeychim hn ye oyotiis owa? ¿Shi ahakòr latikpo? ³¹Òryok poruwo wishì otew erze manakite wahacha owich uje isa pork Porrosht ahwoso tata im: “Ire ishim òr pan uje tära poòrc par otew.”—

³²Jesús tatim òr im: —Titim olak ich tuu ùrpa. Ye Moisespe uje ishim òr erze pan uje tära poòrzkite per ele ahle hn Papa sehe dosim olak ese pan pisht uje tära poòrc. ³³Ese uje itso pan uje Porrosht sehe dosim olak wichi yok uje tokòra poòrznì par tokosim ìrmo oso òr ikirít uje yelij nihna ire.— ³⁴Òr ire otatim otsii: —Irhìche, shish asim òryok erze pan.—

³⁵Jesús tatim òr im: —Yok itso pan uje ishim oso òr ikirít. Uje yeèk tirèt tìr yok ich ìr ikirít de uje yelij nihna ire, heke ire ich shi itso uje yelij iyuwo nèhi hn yelij iich nèhi pork ye dukwi dekirít yetpe. ³⁶Per titim olakike uje amilo uje tiyokòrhna hn shish otiislo yok. ³⁷Nos wir oso uje Papa ishim òr yok otirèt otìr yok, hn nos wir erze uje otirèt otìr yok yelij tesiräha òr.— ³⁸Hn Jesús tatim òr im: —Tokòra poòrc tikirèt titìr ìrmòni par uje tiyokòr uje Porrosht sahmùr pork wichi uje shuu tikirèt. Ye tiyokòrpe uje shi yok tahmùr. ³⁹Wichi uje shuu Tikirètni hn ye nahmùrpe uje tuu yeèk tokolihi pìhme. Uje terihi ìrmo uhurc nehe ich sehe duhu tuu nos òr ikpo erze uje ishim òr yok. ⁴⁰Nos wir erze uje ochiraha yeèkpo Porrosht Ijìt hn ye olotiis ire ich òr ikirít de uje yelij nihna ire. Wichi uje Papa sahmùr. Uje terihi ìrmo uhurc nehe ich tyenij tuu òr ikpo.—

⁴¹Erze israel oso ochinehnim Jesús pork tatim òr im: —Yok uu pan uje tokòra poòrc.— ⁴²Otatimye otsii: —Liki Jesús uu José ijìt. Òryok oyiraha ìr deych hn ìr data. ¿Inaäpo heke tata uje tära poòrznì?— ⁴³Jesús tatim òr im: —Moymlo uje eyehnimlo yok. ⁴⁴Kimiji Papa ye duhu yeèk tirèt tìr yok ich ye tirèt tìr yokpe. Uje terihi ìrmo uhurc nehe ich tuu òr ikpo erze uje otirèt otìr yok. ⁴⁵Erze hute uje erze profeta poruwo wishì ochichewkìte tata shuu itsorz im: “Porrosht nos shiyokoräha òr lahwoso.” Heke nos wir erze uje otèr uje Papa tatim òr hn ochiraha, wir uje otirèt

otĩr yok. ⁴⁶Nĩhyok uje yeẽk umo Papa. Shi ese uje tãra Porrosht wichi uje umo.— ⁴⁷Hn Jesús tatim òr im: —Titim olak ich tuu ùrpa. Ese uje ye lotiis yok ich ir ikirĩt de uje yelij nihna ire. ⁴⁸Yok itso pan uje ishim oso òr ikirĩt uje yelij nihna ire. ⁴⁹Olak poruwo wishi otew erze manakite wahacha ese owich uje isa per shi otoy. ⁵⁰Ese pan uje tãra poõrznı wichi yok. Yeẽk uje ye lotiis yok ich shi itso uje tew ese pan heke wichi ye tĩr urhuta bahluta ehete nehe.— ⁵¹Hn Jesús tatim òr im: —Yok tokõra poõrc. Shi yok itso pan uje ishim oso òr ikirĩt uje yelij nihna ire. Uje yeẽk ye lotiis yok ich shi itso uje tew ese uje itso pan heke ir ikirĩt de uje yelij nihna ire. Tokosim yok oso par oshuu yok oshuu tikiti nehe par uje tokoshi oso òr hnitewihı Porrosht ahir par uje òr ikirĩt de uje yelij nihna ire.—

⁵²Eseekite hn erze israel oso oshiyokosye otsii: —¿İnaãpo heke sehe dosim eyok nõro par uje yahulo? Ye pwele niyokõr duhu ilorzpe.— ⁵³Heke Jesús tatim òr im: —Titim olak ich tuu ùrpa. Yok tokõra poõrznı. Kimiji ye elilo pẽro hn ye ehelo parmista ich nĩhyok ye olak ikirĩt chihipe uje yelij nihna ire. ⁵⁴Ese uje tew pẽro hn ihı parmista ich ir ikirĩt de uje yelij nihna ire. Uje terihı ĩrmo uhurc nehe ich tyenij tuu wichi ikpo, ⁵⁵pork pẽro shi itso oposo uje ishim oso òr ikirĩt hn parmista itspo. ⁵⁶Yeẽk uje shi itso uje tew pẽro hn ihı parmista wichi uje shish ehete kiisihi yok hn yok itspo pehet kiisihi ire. ⁵⁷Papa wichi ika. Wichi shuu Tikirẽtnı hn ishim yok pikirĩt. Yeẽk uje shi itso uje tew pẽro ich tuu ir ikirĩt de uje yelij nihna ire shi itso uje Porrosht ishim yok pikirĩt. ⁵⁸Ese pan uje titim olakike ich tãra poõrc. Wichi ich ye ilo erze maná uje olak poruwo wishı otewkite per wir shi otoy. Yok ese pan uje tãra poõrc. Kimiji yeẽk chihı uje ye lotiis yok ich wichi shi itso uje tew ese pan heke ir ikirĩt de uje yelij nihna ire.— ⁵⁹Jesús nos tata shuu itsorz uje shiyokorãha orĩhi wahacha sinagoga ehete dit Capernaum.

Jesús ishim oso òr ikirĩt uje yelij nihna ire.

⁶⁰Eseekite uje erze ir akile uje ich okihniya ochunt uje Jesús tata shuu itsorz ich okihniya otatimye otsii: —Erze uje ire tata ich kinãhapa. Nĩhyok yeẽk uje pwele sahmũr.— ⁶¹Jesús chiraha uje wir ochinehnim ire. Tatim òr im: —Erze uje titim olakike ¿je duhu etaklo yok? ⁶²Yok tokõra poõrznı. ¿Uhulo inaãpo uje eychimlo yok uje takaashpo titĩr poõrc nehe? Wichi shuu imeheeych uje pahwoso ich ùru heke ye ompe uje etaklo yok. ⁶³Eyok ichibiyo wir uje shuu eyok ikirĩt de. Eyok yũhurrza hn eyok ẽro ye duhu eyok ikirĩt chihipe. Erze pahwoso uje titim olakike wir shi itso ichibiyo pork shuu olak ikirĩt de uje yelij nihna ire, ⁶⁴per olak yewo ode uje yesh otsotiis yok.— Uje ehn yahpaa oso onõya Jesús par ir akile ichii chiraha òr yeniipo uje otsotiis ire hn chiraha yeẽkpo ese uje tyenij chiwãha ire nehe ishim oso. ⁶⁵Hn Jesús tatim òr im: —Olak yewo

otsotiis yok heke titim olakike uje nĩhyok yeẽk pwele tirẽt tĩr yok uje ye Papa duhu tirẽt tĩr yokpe.—

⁶⁶Uje Jesús tata shuu itsorz ich ir akile okihniya uje shish õya ire oym, ye onõya irpe. ⁶⁷Jesús tatim erze dakile uje õr dose im: —¿Je olak ilo õr? ¿Je sehe moymlo yok toy?— ⁶⁸Simón Pedro tatim im: —Irhĩche, ¿oyitĩr irãpo? Ahwoso wir uje shuu õr ikirĩt de uje yelij nihna ire. Nĩhyok yet uje pwele ishim oso õr ikirĩt uje yelij nihna ire.— ⁶⁹Hn tatim im: —Õryok ye oyotiis owape hn oyiraha uje owa uu Cristo, owa uu Porrosht Ijĩt pisht.— ⁷⁰Jesús tatim õr im: —Yok uje tiihla olak uje olak dose hn olak yet de uje wichi dyablo ibik.— ⁷¹Uje Jesús tata shuu itsorz ich shi sorzihi Judas. Wichi Simón Iscariote ir ijĩt. Judas wichi Jesús akilak uje õr dose. Wichi uje tyenij chiwãha Jesús.

Jesús leshibo otsotiis ire.

7 ¹Eseekite hn Jesús shi tĩr lekitiyohochis Galilea sanimirãha Porrosht ahwoso. Ye nahmũr do tĩr Judeape pork erze israel oso õr bahluwo sehe oduhu ire oduhu toy. ²Ich yej terihi erze israel oso õr ahamich uje oshiyokõr õr ihyuwo ochĩra pohir ihyo par otsakaha uut par oshuu daalo arhaabo. ³Heke Jesús ir leshibo otatim otsii: —Atokolihĩ lika. Bo etĩr wahacha Judea par uje erze akile uje odechi oteychim erze kuche uje ahakõr. ⁴Uje sehe yeẽk duhu odĩraha ire ich ye lakispe erze kuche uje shiyokõr. Kimiji nos ahakõr erze kuche uje ye latik pwele niyokõr ich nos uhu oso oteychim owa.— ⁵Ir leshibo otata oshuu itsorz pork otsotiis ire.

⁶Jesús tatim õr im: —Yahpaa terihi pishirĩtpe par uje titĩr wahacha per olak pwele etĩrlo ese õr ahamich shi uje ahmũrlo. ⁷Nos wir oso uje ode nãhu ĩrmo ye odĩtak olakpe per otsitak yok pork tibite orhõta uje õr ire oshiyokõr uje ich mihnũwo.— ⁸Tatim õr im: —Bolilo etĩrlo ese õr ahamich. Yok ye takahape pork yahpaa terihi pishirĩtpe.—

⁹Uje Jesús nos tata erze kuche hn sakaha Galilea, ¹⁰per uje ir leshibo ohnoko otĩr ese õr ahamich hn hno sahn õr ijich chikãha dehet yet. Ye nõya erze osope uje otĩr ese õr ahamich par uje ye duhu oso odirehepe uje tĩr ese õr ahamich toy.

Õr ahamich uje oshiyokõr õr ihyuwo ochĩra pohir ihyo.

¹¹Eseekite hn erze israel oso õr bahluwo ochukuhuchis õr ahamich owich. Otata otsii: —¿Chihĩ irãpo Jesús?— ¹²Erze oso okeytkẽrye uje õr eyucha Jesús per shi otsaraãshi lahwoso. Yewo otata otsii: —Ese hnakĩrbich ich ir iluu om,— per yewo otata otsii: —Ye ir iluu ompe. Wichi shi sehnyẽr oso.— ¹³Nĩhyok yeẽk uje tata ich sihnew pork otola erze õr bahluwo.

¹⁴Eseekite uje erze oso oshiyokõr ese õr ahamich daalo tre o kimiji daalo kwatro ichii Jesús hno masaha templo patikĩt eheth hn shiyokorãha

oso. ¹⁵Erze israel oso òr bahluwo ochishlabe. Otatimye otsii: —¿Inaãpo heke chiraha erze kuche? Ye latik niyokorãha ire.— ¹⁶Jesús tatim òr im: —Erze ahwoso uje tiyokorãha òr ye tãra yokpe. Shi tãra ese uje shuu Tikirëtni. ¹⁷Uje sehe yeëk niyokòr uje Porrosht sahmùr ich chiraha erze uje tiyokorãha oso kimiji tãra Porrosht o kimiji shi tãra yok. ¹⁸Uje yeëk tata uje chiraha kuche ich shi sehe duhu oso onarim ire. Kimiji yeëk duhu wichi dich ese uje shuu wichi tirëtni ich tata uje ich ùru hn ye nehnyër osope. ¹⁹Moisés ishim olak Porrosht ley per hni olak nohmira ye niyokòrpe uje asa ley tata. ¿Inaãpo heke sehe tukulo yok uhulo tikiti?—

²⁰Erze oso otatim otsii: —Demonit de owa ehete heke uhu eyuwo tisër itsorz. ¿Yeëkpo uje sehe duhu owa duhu ati?— ²¹Jesús tatim òr im: —Shi kuchit sohmira uje tiyokòr ese deeych uje otsakirni hn tuu nos as olak ibe. ²²Moisés shuu ahakòrlo yarta yata waa je iich otsii sirkunsisyon. Ye shi Moisespe uje shuu ahakòrlo, shi tãra uu olak poruwo wishi. Kimiji terihi ese deeych uje otsakir par uje ebitilo ese pikihnint ir yarta ich shish ebitilo ir yarta. ²³Par uje ye aluwelo erze ley uje Moisés chichewkite ich shish ebitilo ir yarta. ¿Inaãpo heke etaklo yok uje tukuta ese hnakirbich tuu ire owich om ese deeych uje otsakir? ²⁴Ye èrzlo uje yeëk shiyokòr kuchit mīhnt. Tyenij uhu olak eyuwo tisër uje Porrosht ir ley tata heke erahalo uje ye tiyokòrpe uje mīhnik.—

Jesús tatim oso iraãpo uje ire tãra.

²⁵Eseekite hn erze oso uje odebuhu Jerusalén yewo otata otsii: —¿Je wichi ele hnakirbich uje yesh ochukwi par uje oshuu oshuu toy? ²⁶Hmeychimlo, Jesús yesh shiyokorãha oso hn eyok bahluwo ye otatim ire latik. ¿Je erze eyok bahluwo odiraha uje wichi uu Cristo? ²⁷Per òryok oyiraha uje ese hnakirbich tãra hn uje Cristo tirët nehe ich ye latik diraha uje ire tãra.—

²⁸Uje ehn Jesús shiyokorãha orihichis templo patikit ehete hn chunt erze oso òr ahwoso. Tatim òr ich sihnew im: —Erahalo yok hn erahalo uje tokòra, per ye shi tikirëtpete. Yeëk de uje shuu tikirët. Wichi tata uje ich ùru. Ye erahalo irpe. ²⁹Yok tikiraha ire pork tokòra ire. Wichi uje shuu Tikirëtni.—

³⁰Uje ochunt itsorz ichii sehe odishew ire per nihyok yeëk uje chishew ire pork yahpaa terihi ir ishirëtpete. ³¹Per ich oso okihniya uje ye olotiis Jesuspe hn otatim yewo otsii: —¿Ich olak eyuwo tisër latikpo? Uje Cristo taacha nehe ¿je ma niyokòr kuche uje ye latik pwele niyokòr je erze uje Jesús yesh shiyokòr?—

Fariseo sehe odishew Jesús.

³²Eseekite hn erze uje òr iluuta iich otsii fariseo ochunt uje erze oso òr eyucha Jesús otata shi otsaraashi lahwoso. Erze fariseo hn erze saserdote

ōr bahuwo oshuu hnakirbo yewo uje otibey templo ohno par uje ochishew Jesús. ³³ Jesús tatim erze oso im: —Shi daalo arhaabo uje yok de lika olak ahir hn takaashpo titīr ese uje shuu Tikirētni. ³⁴ Olak tyenij ekulo yok nehe per ye eshlo yokpe pork ye olak pwele etīrlo ese owich uje takaha titīr.—

³⁵ Erze israel oso ōr bahuwo otatimye otsii: —¿Ele hnakirbich sehe do tīr iraāpo heke ye eyok pwele yishlope? Kimiji sehe do tīr erze dihipo ōr hnimo uje israel oso yewo ode. ¿Je sehe niyokorāha erze dihipo kināho? ³⁶ ¿Duhu inaāpo erze uje tatim eyokike im: “Ekulo yok nehe per ye eshlo yokpe” hn tatim eyok uje ye eyok pwele yitīr ese owich uje ire tīr?—

Jesús tyenij shuu Porrosht Ichibich masaha dakile ōr aho nehe.

³⁷ Eseekite uje ich terihi ese ōr ahamich uhurc, ich wichi ese deeych nohmet ma dich je erze yewo. Jesús iyehetihī erze oso ōr ehēt. Sihnew lahwoso tatim ōr im: —Uje yeēk iich sēhi tyenij tīrēt tīr yok hn tuu ihī ese awit. ³⁸ Ese uje ye lotiis yok ich tuu itso uje awit de ire ehēt tuu itso uje Porrosht ahwoso tata shuu itsorz im: “Awit tyenij tokolihi wichi ehēt hn uushi hn yelij nihna ire.”— ³⁹ Ese awit uje Jesús tataka shi siteēta Porrosht Ichibich. Wir uje ye olotiis ire ich ir Ichibich tyenij masaha ōr aho nehe per yahpaa taächpe par masaha ōr aho pork Jesús yahpaa deeshpe tīr poōrc.

Oso ōr eyuwo ye ilyepē, heke oshiyokosyeehe Jesús.

⁴⁰ Eseekite uje erze oso ochunt uje Jesús tata hn yewo otsii: —Wichi ele profetīt uje yesh oyem.— ⁴¹ Yewo otata otsii: —Liki Cristo.— Per yewo otata otsii: —Ye wichpe pork Cristo ye tāra hnimich Galileape. ⁴² Porrosht ahwoso tata uje Cristo ir porokkite wichi rey David. Cristo tyenij shurēhe dīt Belén, ese dīt uje rey David shurēhekite.— ⁴³ Heke erze oso oshiyokosyeehe Jesús pork ye ōr eyuwo ilyepē. ⁴⁴ Yewo ode uje sehe odishew Jesús per nihyok yeēk uje chishew.

Israel oso ōr bahuwo otsotiis Jesús.

⁴⁵ Eseekite hn erze uje otibey templo ocheeshpo otīr erze saserdote ōr bahuwo hn erze fariseo. Erze ōr bahuwo otatim ōr otsii: —¿Inaāpo heke ye ohwīlo petikike?— ⁴⁶ Erze uje otibey templo otatim erze ōr bahuwo otsii: —Nīhyok yeēk uje chīrahapa chiilehet itso Jesús.— ⁴⁷ Erze uje ōr iluuta iich otsii fariseo otatim ōr otsii: —¿Je wichi nehnyēr olak toy? ⁴⁸ Nos israel oso ōr bahuwo otsotiis ire hn erze fariseo ōr itspo.— ⁴⁹ Hn erze ōr bahuwo otatim ōr otsii: —Erze oso ye olotiis Jesús pork ye odīrehepe uje Porrosht ley tata. Wir uje Porrosht sajīr ōr ikiyo.— ⁵⁰ Nicodemo dechi toy. Wichi fariseoya itso ōr. Wichi uje tekirihī Jesús uje dihlakni. Tatim ōr im: ⁵¹ —Eyok ley tata shuu itsorz im: “Uje ehn

yahpaa yēr hnakirbich ahwoso uje tata ich ye ompe uje yērza hn yibite uje shiyokōr mīhnik.”— ⁵²Ōr ire otatim Nicodemo otsii: —¿Je ebuhu Galilea toy? Tyenij owa ler Porrosht ahwoso heke eraha uje nīhyok profetit uje tāra Galilea.— ⁵³Eseekite hn nos wir oso okarēhe lekitiyo otseyhi otīr lahuwo.

8 ¹Uje ehn ohno hn Jesús hno tīr ese wārit eeych uje iich otsii Olivos. ²Uje ehn dihirbit pisht hn cheeshpo tīr templo patikit ehēt. Nos wir oso otirēt otīr ire. Wichi sakir hn shiyokorāha ōr.

Timcharrza waa je torāha dabich.

³Eseekite hn erze uje oshiyokorāha oso waa ley waa je Moisés chichewkite hn erze uje ōr iluuta iich otsii fariseo ohnoy timcharrza waa je torāha dabich otsey erze oso ōr ikich. ⁴Otatim Jesús otsii: —Maestro, oyish ana timcharrza shi torāha dabich. ⁵Moisés ley tata uje tyenij oshuu wir ochīra kojano po oshuu otoy erze uje oshiyokōr oshuu itsorz. Atim ōryok uje tyenij oyiyokōr.— ⁶Wir shi sehe otēr Jesús ahwotik par ōr denunsya ire. Jesús chinkiya hñimich chichew lahwoso chīra nahmita chibite hñimich. ⁷Shish otatim Jesús par uje sehe oduhu tatim ōr ire uje tyenij oshiyokōr heke Jesús seem deheta hn tatim ōr im: —Olak yeēk uje yelij niyokōr uje mīhnik wichi tyenij iyebe shuu asa timcharrza chīra kojano po par shuu wate shuu toy.— ⁸Jesús chinkiya hñimichpo chichew lahwoso chīra nahmita chibite hñimich.

⁹Uje ochunt uje Jesús tata shuu itsorz ich ochuuna heke nohmīr nohmīr otokole ohno. Ese uje ma ilaro tokole wap hn yewo oyehe nēr. Oymihī Jesús hōr asa timcharrza wahacha. ¹⁰Jesús seem deheta tatim asa timcharrza im: —¿Ochihī irāāpo erze hnakirbo uje ōr denunsya owaka? ¿Je yeēk chihī uje sehe duhu owa nīra kojach?— ¹¹Asa timcharrza tatim ire im: —Irhīche, nīhyok uje yeēk shuu yok.— Jesús tatim wate im: —Yok itspo, ye yok denunsya owape. Bo eyhi hn ye ahakōrpo uje ich mīhnūwo.—

Jesús shi itso luu uje shuu ochiraha uje ich ūru.

¹²Eseekite hn Jesús shiyokorāha erze osopo tatim ōr im: —Shi yok itso luu uje chihit nāhu īrmo oso. Uje yeēk ye lotiis yok ich shi itso uje dirkihi luu ehēt hn ye dirkihi dihlelta ehētpe hn tuu wichi ikirīt de.— ¹³Erze uje ōr iluuta iich otsii fariseo otatim Jesús otsii: —Shi owa narim owa. Erze uje atha ye ūrpe pork nīhyok yeēk uje chibite orhōta uje erze uje athaka ich ūru.— ¹⁴Jesús tatim ōr im: —Uje yok narim yok ich shish tiita uje ich ūru pork tikiraha uje tokōra hn tikiraha uje titīr nehe, per olak ye erahalope uje tokōra hn ye erahalope uje titīr nehe. ¹⁵Olak shi ērzlo uje yeēk shiyokōr mīhnik per yok ye tērzape hn tiita uje yeēk shiyokōr uje mīhnik. ¹⁶Per kimiji tiita uje yeēk shiyokōr uje ich mīhnik ich shish

pahwoso ũru pork ye yok nohmirape uje tiita. Papa shuu Tikirētni. Wichi tata toy uje yeēk shiyokōr uje mīhnik. ¹⁷Olak ley tata shuu itsorz im: “Kimiji ōr osiyer oteychim yeēk uje shiyokōr mīhnik ich ōr ahwoso ũru.” ¹⁸Uje yok narim yok ich tiita uje ich ũru pork Papa uje shuu tikirēt tata itsye heke ōryok osiyer uje oyiita.—

¹⁹Heke ōr ire otatim otsii: —¿Eych, chihi iraāpo?— Jesús tatim ōr im: —Ye erahalo yokpe hn ye erahalo Papape. Kirēhe erahalo yok ich erahalo Papa toy.— ²⁰Jesús tatim ōr erze kuche uje ehn shiyokorāha osohochis templo patikit ehēt ye dukuhlehechispe ese owich uje oshimihi Porrosht hnote, per nīhyok uje yeēk chishew ire pork yahpaa terihi ishirītpē.

Jesús tyenij tīr ese owich nehe uje ye ōr pwele otīr.

²¹Eseekite hn Jesús tatim ōrpo im: —Yok tyenij takaha hn tyenij ekulo yok nehe. Uje atilo nehe ich shish olak hñitew de Porrosht ahir pork ahakōrlo uje ich mīhnūwo. Ese owich uje tīr ye olak pwele etīrlope.—

²²Heke erze israel oso ōr bahluwo otata otsii: —Kimiji sehe duhu ire duhu ire toy heke tatim eyok uje ye eyok pwele yitīr ese uje ire tīr.—

²³Jesús tatim ōr im: —Shi olak shurēhe lika hñimich per yok tokōra poōrznī. Shi olak ĩrmo oso per yok ye yok ĩrmo ospe. ²⁴Titim olakike uje atilo nehe ich shish olak hñitew de Porrosht ahir pork ahakōrlo uje ich mīhnūwo. Uje terihi ishirīt uje atilo nehe ich shish olak hñitew de Porrosht ahir kimiji otiislo uje yok uje yesh anemlo.—

²⁵Otatim ire otsii: —¿Owa yeēkpo?— Jesús tatim ōr im: —Wapni nehech ele ahle shish titim olak yok yeēkpo. ²⁶Kuche kihniya uje tyenij titim olak par enshiilo olak iluu pork ahakōrlo uje ich mīhnūwo. Ese uje shuu Tikirētni shish tata uje ich ũru, hn titim ahnūwo ĩrmo oso erze uje wichi tatim yok.— ²⁷Ōr ire ye odirehepe uje Jesús tatim ōr Porrosht iluu ²⁸heke Jesús tatim ōr im: —Yok tokōra poōrznī. Uje owishlo yok nehe ich erahalo uje yok ese uje titim olakike hn ye tiyokōr latik uje shi yok tahmūr. Shi titim olak uje Papa tatim yok ²⁹pork wichi shuu Tikirētni hn shish takashim yok. Yelij noym yok pork shish tiyokōr uje ire sahmūr.— ³⁰Uje Jesús tata shuu itsorz ich oso okihniya uje ye olotiis irpe.

Kuche mīhnūwo chii oso ōr deloho.

³¹Eseekite hn Jesús tatim erze israel oso uje ye olotiis ir petikike im: —Uje shish ahakōrlo erze uje titim olakike ich olak yok pakile pisho. ³²Tyenij erahalo uje ich ũru hn tokoshi olak hñitew nehe par uje ye olak ōr yilope.— ³³Ōr ire otatim otsii: —Ōryok porokkite wichi Abraham. Nīhyok yeēk uje chii ōryok deloho. ¿Īnaāpo heke atha uje eshi ōryok hñitew hn ye ōryok ōr yilope?— ³⁴Jesús tatim ōr im: —Titim olak ich tuu ũrpa. Nos wir erze uje oshiyokōr uje ich mīhnūwo ich erze kuche mīhnūwo chii ōr deloho. ³⁵Ese uje ōr yilak, ir yinsirc wichi ye

ir iispe, hn ese ir ijit wichi ye ir yilakpe. Wichi ir iis ³⁶heke kimiji ese ir Ijit doshi olak hñitew ich ye olak ör yilope. ³⁷Tikiraha uje ārlo olak porokkite Abraham, per sehe tukulo yok uhulo tikiti pork ye ahmūrlope erze pahwoso uje titim olak. ³⁸Shi titim olak uje Papa sowa yok hn olak ahakōrlo uje olak deych tatim olak.—

³⁹Wir otatim ire otsii: —Öryok deych wichi Abraham.— Jesús tatim ör im: —Kîrêhe olak Abraham aabo ich ahakōrlo itso uje wichi shiyokōrkite ⁴⁰per sehe tukulo yok uhulo tikiti pork titim olak uje ich ūru uje tãra Porrosht. Abraham yelij niyokōr duhu ilorz. ⁴¹Olak ahakōrlo shi itso uje olak deych shiyokōr.— Wir otatim ire otsii: —Öryok ye öryok pikihñino kiimope. Öryok deych sohmira de, wichi Porrosht.— ⁴²Jesús tatim ör im: —Kîrêhe Porrosht wichi olak deych ich ahmūrlo yok pork yok tokōra Porrosht. Ye tikirēt petikni uje shi yok tahmūr. Shi Porrosht wichi uje shuu Tikirētni. ⁴³¿Inaāpo heke ye erahalo erze pahwoso uje titim olak? Ye olak pwele erahalo pork ye ahmūrlope par ērlo. ⁴⁴Olak deych wichi dyablo. Shi sehe ahakōrlo uje olak deych sahmūr. Wapkite nehech ele ahle ese dyablo wichi uu ör yūwir. Wichi ye nahmūrpe uje ich ūru pork yelij tata uje ich ūru. Uje tata lekushii ich shi chibite deluu orhōta pork ire kushiyak. Wichi uje wapkite ichii tata lekushii. ⁴⁵Titim olak uje ich ūru per otiislo yok. ⁴⁶¿Je olak yeēk chihî uje umo uje tiyokōr mñhnik? Nñhyok. Titim olak uje ich ūru. ¿Inaāpo heke otiislo yok? ⁴⁷Erze uje ör Porrosht aabo ich otsahmūr otēr ir ahwoso per olak ye olak Porrosht aabo pork ye ahmūrlo ērlo ir ahwospe.—

Uje ehn yahpaa Abraham chihipe ich Cristo de.

⁴⁸Eseekite hn erze israel oso otatim Jesús otsii: —Ich ūru uje oyitim owa uje owa samaria os hn demonit de owa ehēt.— ⁴⁹Jesús tatim ör im: —Ye demonit chihî pehetpe. Shi yok narim Papa per olak otiislo yok. ⁵⁰Ye yokpe uje sehe yok narim yok. Yet de uje sehe narim yok. Wichi uje tyenij tata uje tiyokōr om hn uje ahakōrlo uje ich mññūwo. ⁵¹Titim olak ich tuu ūrpa. Erze uje oshiyokōr uje tahmūr wir yelij otoy.—

⁵²Erze israel oso otatim otsii: —Ele ahle ich oyiraha uje demonit de owa ehēt. Abraham tokite hn nos wir profeta poruwo wishî otoyto, per owa atha uje kimiji yeēk niyokōr uje ahmūr ich yelij toy. ⁵³¿Je owa ma dich je eyok porokkite Abraham? Wichi tokite hn nos wir profeta poruwo wishî otoyto. ¿Eyuwo tisîr uje owa yeēkpo?— ⁵⁴Jesús tatim ör im: —Kimiji shi yok narim yok ich pahwoso ye jukur. Ese uje narim yok wichi yok Papa. Wichi uje shish athilo uje wichi uu olak Deych Porrosht ⁵⁵per ye erahalo irpe. Yok tikiraha ire. Kimiji tiita uje ye tikiraha ire ich yok kushiyak itso olak. Ich ūrpa uje tikiraha ire hn tiyokōr uje tatim yok. ⁵⁶Abraham wichi uu olak porokkite. Wichi ich ayla uje Porrosht shuu teychim erze daalo uje yok de ĩrmo nehe. Teychimkite hn ayla.—

⁵⁷Erze israel oso otatim Jesús otsii: —Yahpaa owa sinkwenta ãyope per atha uje amo Abrahamkite.— ⁵⁸Jesús tatim òr im: —Titim olak ich tuu ùrpa. Uje ehn yahpaa Abraham chihikite ichii yok de.— ⁵⁹Òr ire ochishew kojano po par uje sehe oduhu Jesús. Wichì sakis ire hn tokolihi templo patikit eheth hn hno.

Hnakirbich uje shurhàkìte shì olìbik.

9 ¹Eseekite uje ehn Jesús hno hn chish hnakirbichihi dehet pehet. Uje shurhàni shì olìbik. ²Ìr akile otatim otsii: —Maestro, ¿yeèkpo uje shiyokòr uje mihnikni heke wichì shùrha olìbik? ¿Je ìr deyeh o je ìr data uje oshiyokòr mihnik o je ìre heke shùrha olìbik?— ³Jesús tatim òr im: —Shì shùrha itsorz par uje oso ochiraha uje Porrosht chukuta wichì nehe. Ìre ye niyokòrpe uje mihnuwo uje shuu shùrha itsorz, hnii ìr deyeh hnii ìr data ye oniyokòrpe uje mihnuwo. Shì shùrha itsorz. ⁴Aslo obiyo uje ich deeyeh pork yej terihi uje dihlah ich nihyok yeèk uje shiyokòr obiyo. ⁵Uje ehn yok de nàhu ìrmo ich shì yok itso luu par tihit nàhu ìrmo oso par tuu ochiraha uje ich ùru.— ⁶Uje tata shuu itsorz hn titiràha hnimich chira dahlo, shiyokòr katuta hn tormìhi ese hnakirbich ile. ⁷Tatim im: —Bo etìr ese tejman uje iich otsii Siloé par erhù ele.— Ese Siloé wichì òr ahwosht uje otsii hno. Heke ese hnakirbich uje olìbik hno churhù dele. Uje cheeshpo ich umo lekìtiyo.

⁸Erze oso uje odebuhu ìr ihyuch ahìr hn erze uje omoni uje sapur hnote otatimye otsii: —¿Je liki uu hnakirbich uje ehn sakaha wahachni shì sapur hnote?— ⁹Yewo otata otsii: —Wichì.— Hn yewo otsii: —Ye wichpe. Ìr ile itsshìp wichì.— Per wichì tatim òr im: —Yok uje ehn tapur hnotni.— ¹⁰Otatim ìre otsii: —¿Ìnaäpo ele ahle ich owa pwele amo lekìtiyo?— ¹¹Tatim òr im: —Hnakirbich uje iich otsii Jesús shiyokòr katutaka hn tormìhi pile hn tatim yok im: “Bo etìr ese tejman uje iich otsii Siloé hn erhù ele.” Heke takaha turhù pileke hn tokomo lekìtiyo.— ¹²Òr ire otatim otsii: —¿Chìhi ìraäpo ese hnakirbich?— Tatim òr im: —Ye tikiraha watik.—

Erze fariseo sehe odìraha yeèkpo chukuta ese hnakirbich uje olìbik.

¹³Eseekite hn ohnoy ese hnakirbich uje olìbikhna otseya erze fariseo. ¹⁴Ese deeyeh uje Jesús shiyokòr katuta hn chukuta ese hnakirbich uje olìbik wichì deeyeh uje otsakìr. ¹⁵Erze fariseo otatim ìre toy otsii: —¿Ìnaäpo ele ahle ich owa pwele amo lekìtiyo?— Tatim òr im: —Chìbìte katuta pileke hn turhù heke tokomo lekìtiyo.—

¹⁶Erze fariseo yewo otatimye otsii: —Ese hnakirbich uje chukuta wichì olìbithna ich ye Porrosht ìbìkpe pork shish chishew obiyo ese deeyeh uje otsakìr.— Per fariseo yewo otata otsii: —Ese hnakirbich ye niyokòrpe uje mihnuwo. Ìmeheeyeh pork Porrosht shish takashim ìre shiyokòr erze

uje ye latik pwele niyokōr.— Heke ye ōr eyuwo ilyepe. ¹⁷Otatimpo ese uje olibikhna otsii: —Hap owa, ese hnakirbich uje chukuta owa ¿uhu eyuwo tis̄ir uje wichi yeēkpo?— Tatim ōr im: —Wichi profetya.—

¹⁸Erze israel oso ōr bahluwo otsotiis uje ese hnakirbich olibikni hn yeēk shuu umo lekitiyo heke otibii ir deych hn ir data par oshuu otirēt. ¹⁹Otatim ōr otsii: —¿Je liki olak ijo uje shish athilo uje shurhāni shi olibik? ¿Inaāpo heke ele ahle ich pwele umo lekitiyo?— ²⁰Ir deych hn data otatim ōr otsii: —Oyiraha uje liki ōryok ijo, hn oyiraha uje shurhāni shi olibik, ²¹per ye oyiraha inaāpo heke ele ahle ich umo lekitiyo, hn ye oyiraha yeēkpo uje chukuta ire. Atimlo ire. Wichi ich terihi leherc hn pwele tatim olak yeēkpo uje chukuta irhna.— ²²Ir deych hn data otata oshuu itsorz pork otola erze israel oso ōr bahluwo pork wir ochibitni uje yeēk tata Jesús uje wichi Cristo ich otsāhirm ire par uje ye teeychāha Porroshtihī ōr ahir sinagoga ehēt. ²³Heke ir deych hn data otatim ōr otsii: —Ōryok ijit ich terihi leherc. Ekitkērlo ire.—

²⁴Erze israel oso ōr bahluwo otibiipo ese uje ehn olibikhna otatim otsii: —Uhu Porrosht dich. Ese hnakirbich uje chukuta owahna shish shiyokōr uje ich mihnūwo.— ²⁵Tatim ōr im: —Yok ye tikiraha kimiji wichi shish niyokōr uje mihnūwo o kimiji yelij niyokōr. Shi tikiraha uje waphna yok olibik per ele ahle ich tokomo lekitiyo.— ²⁶Ōr ire otatim otsii: —¿Duhu inaāpohna heke shuu amo lekitiyo?— ²⁷Tatim ōr im: —Ich titim olakhna per ye ahmūrlo ērlo yokpe. ¿Inaāpo heke sehe uhulo titim olakpo? ¿Je sehe amsahalo par olak ir akile toy?—

²⁸Wir ochish majamich hn otatim ese hnakirbich otsii: —Owa ir akilak per ōryok oyiyokōr uje Moisés lishi tata. ²⁹Oyiraha uje Porrosht keytkēr Moiseskite per ese hnakirbich ye oyiraha uje tāra.— ³⁰Tatim ōr im: —Ich uhulo tish pibe uje ye erahalo uje ire tāra per wichi uje chukuta yok shuu tokomo lekitiyo. ³¹Nos yirahalo uje Porrosht ye tēr wirpe erze uje oshiyokōr mihnūwo. Shi tēr erze uje oteeychāha ire hn oshiyokōr uje ire sahmūr. ³²Uje ĩrmo tenit nehech ele ahle oso yelij onunt uje yeēk chukuta yet ir ile uje shurhāni shi olibik. ³³Kirēhe ye ese hnakirbich tāra Porrosht ich ye pwele niyokōr latik.— ³⁴Ōr ire otatim otsii: —Yeēk de uje shiyokōr uje mihnik heke uje owa shurhāni ich owa olibik hn ele ahle sehe ahakorāha ōryok.— Oshuu tokolihichis ōr ehēt par uje ye teeychāha Porrosht sinagoga ehētpo.

Erze uje ye odiraha Porroshtpe ich ōr itso olibo.

³⁵Eseekite hn Jesús chunt uje ochiyuhu ese hnakirbich ōr ehethna heke hno chukwi. Uje chish ire hn tatim im: —¿Je ye otiis ese uje tāra poōrzni?— ³⁶Ire tatim im: —Irhiche, atim yok otik par uje ye tokotiis ire.— ³⁷Jesús tatim im: —Amoko. Wichi yok uje yesh tikitkēr owa.— ³⁸Ire tatim im: —Irhiche, ye tokotiis owape,— hn teeychāha Jesús.

³⁹Jesús tata im: —Tikirēt titīr nāhu irmōni par tehek oso. Erze uje ye odiraha Porroshtpe ich tuu ochiraha shi itso uje ōr olibo hn tukuta ōr ile, per erze uje ochibite uje ochiraha Porrosht ich tuu ōr itso olibo.—

⁴⁰Erze fariseo nohmiramo odechi toy Jesús ahir. Uje ochunt uje Jesús tata shuu itsorz hn otatim otsii: —¿Je ōryok olibo toy?— ⁴¹Jesús tatim ōr im: —Kimiji olak ilo erze olibo uje tukuta ōr pork ochiraha uje ōr nesita yeēk takashim ōr ich ye kuche mihnūwo chihi olakpe, per ye olak ilo ōr heke athilo uje erahalo Porrosht pork ich uhulo itso uje amilo lekityo heke Porrosht seeyta olak erze kuche mihnūwo uje ahakōrlo.—

Jesús wichi shi itso yeēk uje tibey pishi obeje.

10 ¹Eseekite hn Jesús tatim ōr im: —Titim olak ich tuu ūrpa. Yeēk uje ye dikāha asa uhurrza par masaha erze obeje uut per iyuwe ich wichi echikit. ²Mahn ese uje chikāha asa uhurrza par masaha ehēt wichi uje tibey erze obeje. ³Ese uje tibey asa uhurrza sitsēr hn erze obeje yinsirc masaha. Wichi tibii erze obeje nohmir nohmir chiyuhu iiyo. Erze obeje chunt heke tīr ire. Wichi iyeebe par chiyuhu orīhichis shikero ehēt. ⁴Uje nos tokolike ich wichi hno iyeebe hn erze obeje iyehe nēr pork chiraha ir ahwoso. ⁵Erze obeje ye sehe yeēk nērpe uje ye diraha. Uje chunt ir ahwoso ich chiraha uje ye wichpe uje tibey heke uushi iim.—
⁶Erze uje Jesús tatim ōrke shi siteēta per ōr ire ye odirehepe

⁷heke tatim ōrpo im: —Titim olak ich tuu ūrpa. Yok itso asa uhurrza uje obeje chikāha. ⁸Nos wir erze uje ochii ire yokihi hn otirēt uje ehn yahpaa tikirēt wir echiko hn erze uje ōr iluu mihnū per erze obeje ye nahmūr tēr ōrpe. ⁹Yok itso asa uhurrza. Erze uje otīr yok pork sehe odikāha asa uhurrza wir uje tokosim ōr ikirīt uje yelij nihna ire. Ōr itso obeje uje masaha ehēt hn tokole hn chish ihnemiyo uje ich ihīrtso. ¹⁰Ese echikit tirēt shi par uje sehe tohir hn shuu shuu toy hn sihna per yok Tikirētni par tokosim oso ōr ikirīt uje yelij nihna ire. Ese ikirīt ich ihīrtpa.

¹¹Yok itso ese uje tibey pishi obeje. Ese uje tibey pishi obeje ishīm dekirīt par erze ir obeje. ¹²Ese uje shi chishew obiyo par tibey erze obeje wichi ye erze obeje ir yinsirc pishtpe, heke uje umo loshipit uje tirēt sehe dishew erze obeje ich wichi uushi iim erze obeje. Ese loshipit chishehe erze obeje hn yēr chūr lekityo. ¹³Ese hnakirbich uushi iim erze obeje pork chishew obiyo shi par serz hnote. Par ire ich ye latikish erze obeje.

¹⁴Per yok itso ese uje tibey pishi obeje. Tikiraha erze yok obeje hn erze yok obeje chiraha yok ¹⁵shi itso Papa chiraha yok hn tikiraha ire. Tokosim pikirīt par uje oshuu yok oshuu tikiti par erze obeje. ¹⁶Israel oso wir ōr itso obeje weeta. Weeta yata de uje ye ōr israel osope. Wir tyenij tokōhwa hn otēr yok. Heke uje uhurc ich shi weeta sohmira de hn ese uje tibey ōr shi sohmira. ¹⁷Papa ich sahmūr yok pork tokosim pikirīt par

tikitíhi erze obeje hn tyenij yok ikpo nehe. ¹⁸Níhyok yeék uje shuu yok shuu tikití. Shi tahmūr heke tokosim yok oso par oshuu yok oshuu tikití. Pukurbo de par tokosim ōr yok hn oshuu yok oshuu tikití, hn pukurbo de par uje tuu yok ikpo nehe. Wir uje Papa shuu tiyokōr.—

¹⁹Eseekite uje erze israel oso ochunt erze ahwoso uje Jesús tata ich oshiyokosye pork ye ōr eyuwo ilyepe. ²⁰Okihniya uje otata otsii: — Demonit de ehēt. Wichí totihla. ¿Inaāpo heke ěrlo ire?— ²¹Yewo otata otsii: —Erze ir ahwoso ye ilope ese uje demonit de ehēt. ¿Je demonit pwele chukuta ese uje olíbiik hn shuu umo lekitiyo? Ye pwelpe.—

Erze israel oso ōr bahuwo otsítak Jesús.

²²Eseekite hn teríhi uu deeych uje oshiyokōr ōr ahamich uje ōr eyucha uje otohirm temploni wahacha Jerusalén. Wichí uu hmamo ishírít.

²³Jesús dechi templo patikit ehēt, shí dirkihichis puurc uje iich otsii Salomón. ²⁴Erze israel oso ōr bahuwo otakisho lawichihichis Jesús ahír hn otatim otsii: —¿Latik nehe hn atim ōryok kimíji owa uu Cristo o kimíji ye owape? Atim ōryok ich uhu imeheeychpa par uje oyíraha.— ²⁵Jesús tatim ōr im: —Titim olakni per otiislo yok. Nos wir kuche uje tiyokōr tīra Papa ir ukurbo chíbite orhōta yok yeékpo ²⁶per otiislo pork ye olak ilo erze yok obeje uje tikíbe. ²⁷Erze oso uje ye olotiis yok wir shí ōr ítso obeje pork ochunt pahwoso hn yok tikíraha ōr. Uje tiyebe ich oyehe piyēr. ²⁸Tokosim ōr ikírít uje yelij nihna ire. Yelij otír urhuta bahluta ehēt. Níhyok yeék uje chiyuhu oríhi píhme. ²⁹Papa wichí uje ishím ōr yok. Níhyok yeék uje ma dich je ire. Níhyok yeék uje pwele chiyuhu oríhi Papa hme. ³⁰Papa hn yok shí ōryok nohmíra.—

³¹Erze israel oso ōr bahuwo ochishew kojano po par uje sehe oduhu Jesús oduhu toy. ³²Jesús tatim ōr im: —Tiyokōr kuche uje ich kihniya hn ihírtsō olak ikích tīra Papa ir ukurbo. ¿Obitíkíhi ese uje sehe duhu tukulo yok uhulo tikití ěrlo yok kojano po?— ³³Erze israel oso ōr bahuwo otatim otsii: —Ye erze obiyo ihírtsōpe uje ahakōr duhu oyuhu owa. Shi eyehnim Porrosht heke sehe oyuhu owa pork owa shi hnakirap per sehe uhu owa ilo Porrosht.—

³⁴Jesús tatim ōr im: —Olak ley tata shuu itsorz im: “Porrosht im: Titim olak uje olak porrosht.” ³⁵Níhyok uje yeék pwele sata uje Porrosht ahwoso tata. Erze oso uje Porrosht ishím ōr lahwoso wir uje ire tata uje wir ōr porrosht. ³⁶Wichí uje chiihla yokni hn shuu tikírēt titír náhu írmo. ¿Inaāpo heke athilo uje tipuuhnim Porrosht shí pork titim olak uje yok uu Porrosht Ijít? ³⁷Kimíji ye tiyokōr erze Papa ir íbiyo ich om uje otiislo yok. ³⁸Per uje tiyokōr Papa ir íbiyo ich ye otiislope erze ir íbiyo uje tiyokōr pork shuu imeheeych uje yok ir Ijo heke tyenij erahalo uje Papa de yok hn yok de Papa heke shí ōryok nohmíra.— ³⁹Sehe odishew írpo per ire tokolíhi ōr ehēt hn hno.

⁴⁰Jesús tokoliñichis hno tĩr onoota Jordán pit yet hn sakahachis ese owich uje Juan lishi tohirm osohoni. ⁴¹Ich oso okihniya uje otirēt otĩr ire. Otatimye otsii: —Juan yelij niyokōr kuche uje ye latik pwele niyokōr per nos wir Juan ahwoso uje tata ese hnakirbich wir ich ũru.— ⁴²Ich okihniya uje ye olotiis Jesuspe uje dechi ese owich.

Lázaro ich toy.

11 ¹Eseekite hn hnakirbich de wahacha dīt Betania uje permo. Ir iich otsii Lázaro. María hōr nanimicha Marta odechi ese dīt toy. ²Asa María wate uje tormĩhi eyok Irhĩch ir hnite perfumekite hn sekar chĩra lakĩrt. Wate ese Lázaro uje permo ir nanap. ³Erze Lázaro nanime oshuu yet hno tĩr Jesús par tatim ire sole: —Irhĩche, ese ahērt uje ahmūr ich permo.— ⁴Heke Jesús tatim dakile im: —Ese permit ye duhu wichi tope. Shi chishew ire par uje shuu oso onarim Porrosht hn par shuu onarim Porrosht Ijĩt toy.— ⁵Jesús ich sahmūr Marta hn ir nanimicha María hn ōr dehebich Lázaro.

⁶Uje Jesús chunt uje Lázaro permo ich ye do tĩr ire nehech daalo osiyer. ⁷Uje iyuwe erze daalo osiyer hn tatim dakile im: —Yukulo yitĩrlo wahachpo hñimich Judea.— ⁸Ir akile otatim otsii: —Maestro, erze israel oso ōr bahluwo uje ehn owa de wahachni hn sehe oduhu owa onĩra owa kojano po hn ¿je ele ahle sehe etĩr wahachpo?— ⁹Jesús tatim ōr im: —Uje deeych chihit nāhu ĩrmo ich shi dose ora hn uje yeēk dirkihi deeych ich ye kojano duhu ir hnitepe pork deeych chihit hn umo dejich, ¹⁰per kimiji yeēk dirkihi dihlelta ich shish kojano shuu ir hnite pork niñyok uje chihit ire.—

¹¹Uje tata shuu itsorz hn tatim ōrpo im: —Eyok ihyēt Lázaro yesh umo. Takaha par uje tiniyēr ire.— ¹²Ir akile otatim ire otsii: —Irhĩche, kimiji shi umo ich wisik wisik hn owich ompo.— ¹³Jesús shi siteēta uje Lázaro shi umo per ich toy, heke erze ir akile ōr pyensa uje Lázaro shi umo.

¹⁴Jesús tatim ōr ich shuu imeheeychpa im: —Lázaro ich toki. ¹⁵Tahmūr uje ye eyok chĩhi wahachpe pork ele ahle ich ye tuu otiislo yokpe.— Tatim ōr im: —Yukulo yitĩrlo Lázaro ihyuch.— ¹⁶Tomás uje ir alokot otsii Arāho tatim erze Jesús akile yewo im: —Yukulo yukwĩya ire par uje yitilo toy.—

Jesús shuu oso ōr ikpo hn ishim ōr ikirĩt.

¹⁷Eseekite uje Jesús taachĩhichis hn chunt uje Lázaro ich tohna hn ochihĩsim ire ich daalo kwatro. ¹⁸Ese dīt Betania ye dukuhlehechispe dīt Jerusalén, kimiji tre kilometro ¹⁹heke erze israel oso ich okihniya uje ohno otĩr wahacha par otekirĩhi Marta hn María par uje oshuu ōr aho kiis pork ōr dehebich Lázaro tohna. ²⁰Uje Marta chunt uje Jesús yehe tirēt hn tokole dalehe arhĩch. Shi María sakaha dahuch. ²¹Marta tatim

Jesús im: —Irhîche, kirêhe owa chihi likhna ich pehebich ye tope, ²² per tikiraha uje apur Porrosht kuchêrk ich shish ishîm owa.—

²³Jesús tatim wate im: —Owa ehebich tyenij ikpo.— ²⁴Marta tatim im: —Tikiraha uje tyenij ikpo nehe uje topo ôr ikpo uje îrmo uhurc.— ²⁵Jesús tatim im: —Yok uje tuu oso ôr ikpo hn tokosim ôr ikirît uje yelij nihna ire. Ese uje ye lotiis yok uje toy ich shish ir ikirît de uje yelij nihna ire, ²⁶ hn nos wir uje ye olotiis yok uje yesh ôr ika wir ye otope hn otîr urhuta bahluta ehêt petik nehe. ¿Je ye otiis uje titim owaka?— ²⁷Wate tatim im: —Irhîche, ye tokotiis uje owa Cristo uu Porrosht Ijît uje tyenij tirêt tîr îrmo.—

²⁸Uje wate tata shuu itsorz hn hno tibii nanimicha María. Keytkêr saraâshi lahwoso tatim María im: —Maestro de wahacha. Tibii owa.— ²⁹Uje chunt uje Jesús tibii ich iyehet shichish hno tîr ire. ³⁰Jesús yahpaa masaha ditpe, shi de wahacha owich uje Marta chishihike.

Jesús yerh.

³¹Eseekite hn erze israel oso ode María ihyuch par otibey wate par uje oshuu ehêt kiis. Uje omo uje wate iyehet shichish hn hno ich otsahn ijich. Wir shi otsêrza uje María tîr dukuta par uje yerh. ³²Uje María taachîhi ese owich uje Jesús de hn icha dîte hnimoho ikich tatim im: —Irhîche, kirêhe owa chihi likhna ich pehebich ye tope.— ³³Uje Jesús umo María uje yesh yerh hn erze israel oso oyerh toy hn Jesús ich dosdarak pork chuuna. ³⁴Tatim María im:

—¿Odihitsimîhi

iraâpohna?— Otatim otsii: —Irhîche, erêt, eychîm.— ³⁵Jesús yerh, ³⁶heke erze israel oso otatimye otsii: —Hmeychîmlo, ich sahmûr pishi wichi.— ³⁷Per yewo otatimye otsii: —Likî uje shuu ese olîbit umo lekityoni. Kirêhe chihi likhna ich chukuta Lázaro ye duhu tope.—

Jesús shuu Lázaro ikpo.

³⁸Eseekite uje Jesús sitîr ire asa dukuta ich dosdarakpo pork chuuna. Ir dukuta de kojach onta hn ir uhurrza shi kojach. ³⁹Jesús tatim ôr im: —Eyuhulo ese kojach ir uhurrza.— Marta wate ese topit ir nanimicha tatim im: —Irhîche, ich mîhnê pork ich daalo kwatro uje toy.— ⁴⁰Jesús tatim Marta im: —Titim owaka, kimîji ye otiis uje ehebich ikpo ich eychîm uje Porrosht shiyokôr.— ⁴¹Uje ochiyuhu ese kojach uhurrzaka hn Jesús teychîm poôrc. Tatim Porrosht im: —Dii Porrosht, tikînship owa pork owa shish êr yok. ⁴²Tikiraha uje shish êr yok per shi tiita tuu itsorz par uje tuu nâhu oso uje ode lika otêr par uje odîraha hn ye olotiis uje owa uhu Tikirêtni.— ⁴³Uje tatim Porrosht shuu itsorz hn sihnew lahwoso im: —Lázaro, atokoliñichis.— ⁴⁴Ese uje tohna ich tokoliñichis dukuta. Uje ochihitsimhna ich oshiyeru ir hme hn ir hnîte hn oshiyeru ir irmiyo ochîra bortisht. Jesús tatim ôr im: —Eyuhulo par uje pwele dirk.—

Israel oso òr bahluwo sehe odishew Jesús.

⁴⁵Eseekite hn erze israel oso uje òya María oteychim uje Jesús shiyokòrke heke ich okihniya uje ye olotiis irpe ⁴⁶per yewo ohno otìr erze fariseo otatim òr uje Jesús shiyokòrke. ⁴⁷Heke erze fariseo hn erze saserdote òr bahluwo oshuu Junta Suprema otakisho lawich. Otatim òr otsii: —¿Yiyokòrlo latikpo? Ese hnakirbich shish shiyokòr kuche uje ye latik pwele niyokòr. ⁴⁸Kimiji ye yontilo ire uje shiyokòr shuu itsorz ich nos oso ye olotiis irpe. Heke erze romano oso tyenij otirèt nehe hn otsehnimich asa eyok templo hn nos otsihna eyok ihnapso.—

⁴⁹Caifás dechi toy. Wichì uu saserdote òr bahlut pisht uje yesh sakaha par ese äyt. Tatim òr im: —Olak ye erahalo latik. ⁵⁰¿Je ye imeheeychpe parolak uje ich ma om oshuu hnakirbich nohmet oshuu toy par sosir oso je uje nos eyok ihnapso tyenij otoy?— ⁵¹Ye tãra Caifás ir eyuwope uje tata shuu itsorz. Wichì uu saserdote òr bahlut pisht uje yesh sakaha par ese äyt heke Porrosht shuu tata uje Jesús tyenij toy par takashim israel oso. ⁵²Per ye shì par erze israel osope uje takashim òr. Tyenij shuu wir otakisho lawich erze Porrosht aabo uje ode lekityo. ⁵³Uje tata shuu itsorz hn erze israel oso òr bahluwo ichii ochukwi Jesús iluu par uje sehe oduhu ire oduhu toy.

⁵⁴Heke esseekite hn Jesús ye dirkihi erze israel oso òr ehettepe uje ode hnimich Judea, per hno tìr wahacha dít uje iich otsii Efraín ye dukuhlehechispe hnimich uje isa. Sakahachis hór wir dakile. ⁵⁵Eseekite ich yej terihi erze israel oso òr ahamich uje iich otsii Pascua. Ich oso okihniya uje otokolihi erze duwo ijaabo hn ohno otìr Jerusalén par ese òr ahamich. Ohno wap par uje onishii ire par uje òr pwele omasaha templo patikit ehete. ⁵⁶Uje ehn oyehet wahacha templo patikit ehete ich shish ochukwi Jesús. Otatimye otsii: —¿Hap olak, olak eyuwo tisìr latikpo? ¿Je wichì tìrèt tìr ele òr ahamich?— ⁵⁷Erze saserdote òr bahluwo hn erze fariseo otatim nos wir osohna otsii: —Uje olak yeèk diraha chihì iraäpo Jesús ich tyenij atimlo òryok par oyishew ire.—

María tormìhi perfume Jesús hnìte.

12 ¹Eseekite uje ehn yahpaa terihi daalo seys par ese òr ahamich uje iich otsii Pascua hn Jesús hno tìr wahacha dít Betania. Ese dít wichì uje Lázaro debuhu uje Jesús shuu ikponi. ²Wir oshiyokòr oposohochis par Jesús. Marta ishim òr poso hn Lázaro sakaha Jesús ahìr hór wir yewo nemest wirc. ³María tóhwa perfume uje iich otsii nardo par tormìhi Jesús hnìte. Ese perfume kimiji medyo litro. Wichì ich debichpa. Tormìhi Jesús hnìte ese perfume hn sekar chìra lakìrt. Ir ihyuch ich perfume aat dichpa. ⁴Jesús ir akile odechi. Sohmet de uje iich otsii Judas Iscariote. Wichì uje tyenij chiwāha Jesús nehe. Judas tata

im: ⁵—¿Inaãpo heke ye anuwãhalope ese perfume uhulo debich, shi itso uje hnakirbich chishew obiyo nehech äyt nohmira par asimlo baho erze losuhlaabo?— ⁶Judas shi tata shuu itsorz. Wichì ye nahmür takashim erze losuhlaabope. Tata shuu itsorz pork ire echikit. Tibey ese kotsirbit ijaabit uje erze hnote de uje oso oshim Jesús. Torha erze hnote uje ochimchaha ese kotsirbit ehèt. ⁷Jesús tatim òr im: —Ye ahakoslo wate. Shi chihmer ese perfumeni nehech ele ahle par uje tormìhi yok shi itso uje tikitike, pork deeych yet nehe hn ochihitsim yok. ⁸Erze losuhlaabo shish ode olak ahir nehe par ye shish yok chihi olak ahir petik nehe.—

Israel oso òr bahluwo sehe oduhu Lázaro oduhu toy.

⁹Eseekite hn erze israel oso ich okìhniya ochunt uje Jesús dechi dit Betania heke ohno otìr wahacha par oteychim ire. Ye shi sehe oteychim Jesuspe. Sehe oteychim Lázaro toy uje Jesús shuu ikponi, ¹⁰heke erze saserdote òr bahluwo ochibite par uje sehe oduhu Lázaro oduhu toy. ¹¹Pork erze israel oso ich okìhniya uje omo Lázaro uje ikponi heke oym erze israel oso òr bahluwo hn ye olotiis Jesuspe.

Jesús tìr Jerusalén.

¹²Eseekite ich oso okìhniya ohno otìr Jerusalén par ese òr ahamich. Uje deychole hn wir ochunt uje Jesús yehe tìrèt. ¹³Ohnöy hìr ihyò hn ohno otokolìhi Jerusalén par uje olalehe Jesús arhìch. Otata ich otsihnew lahwo so otsii: —Sehe oyuhu Porrosht dosìr òryok. Sehe oyuhu òryok ìrhìch Porrosht diyuhu lahwo so omoho ese uje shuu tìrèt. Wichì uu israel oso òr rey.— ¹⁴Jesús chish buritit hn iyãha shi itso uje Porrosht ahwo so tata im: ¹⁵—Olak uje ebuhulo ese dit Jerusalén ye atililo latik. Jerusalén ir iich yet otsii Siòn. Eychimlo, olak rey yehe tìrèt iyãha buritit uje ijaap.— ¹⁶Wap erze ir akile ye odiraha erze ahwo so uje sorzihi Jesús, per uje Jesús hno tìr poòrc ich òr eyucha uje Porrosht ahwo so tata shuu itsorz. Ire nos shuu yakaha.

¹⁷Erze oso uje ode Jesús ahirni hn omo uje tibii Lázaro uje de dukuta ehèt hn shuu ikpo wir otata erze uje òr ire omoni. ¹⁸Erze oso ich okìhniya uje ochunt uje Jesús shuu Lázaro ikponi heke otokolìhi dit odalehe arhìch. ¹⁹Erze fariseo okeytkèrye otsii: —Hmeychimlo, ye eyok pwele yiyokòrlo latik. Nos wir oso ohno òya ire.—

Griego yewo ochukwi Jesús.

²⁰Eseekite hn uu griego yewo nohmiramò ohno òya erze yewo uje otìr ese òr ahamich uje de wahacha Jerusalén par oteeychãha Porrosht. ²¹Wir otsitìr ire Felipe. Wichì tãra dit Betsaida uje de hnimich Galilea. Otatim Felipe otsii: —Ìrhìche, sehe oyekirihi Jesús.— ²²Felipe hno tatim Andrés hn ohno otatim Jesús. ²³Jesús tatim òr im: —Ich yej terihi pishirìt. Yok

uje tokõra poõrzni tyenij takaha titir poõrzpo. ²⁴Titim olak ich tuu urpa. Uje trigo eyhita kayihi hnimich per ye masaha hnimich uutpe ich shi eyhita nohmira uje dechi, per uje ochukwēr itso uje ochihitsim topit ich tokole hn ir ee de ich kihniya. Shi yok itso uu trigo eyhita pork tyenij tikiti par uje tuu Porrosht aabo okihniya uje ode nehe. ²⁵Ese uje ich sahmūr erze kuche uje de nāhu irmo, uje uhurc hn nos pyerte. Per ese uje ye nahmūr erze kuche uje de nāhu irmo ich tibey ire par uje ir ikirit de uje yelij nihna ire. ²⁶Uje yeēk chishew pibiyo ich shish tyenij chikāha pijich heke ese owich uje yok de ich wichi shish de toy. Kimiji yeēk niyokōr pibiyo ich Papa narim ire.—

²⁷Hn Jesús tatim ōr im: —Ele ahle ich yok dosdarakpa. ¿Titim Papa latikpo? ¿Je om uje titim par takashim yok par uje ye erze kuche mihnūwo tīr yok nehe? Ye ompe uje titim ire tuu itsorz. Tikirēt titir irmōni par uje wir tīr yok.— ²⁸Hn Jesús tatim Porrosht im: —Papa, ebite orhōta uje owa dich.— Uje tata shuu itsorz hn ōr ahwoso tāra poōrc im: —Ich tuu imeheeych uje yok dich hn tyenij tuu imeheeychpo nehe.— ²⁹Erze oso uje odechi ochunt erze ahwoso hn otatimye otsii: —Nar.— Yewo otsii: —Anjel keytkēr ire.— ³⁰Jesús tatim ōr im: —Erze ahwoso uje entloko ye par takashim yokpe, shi par uje takashim olak. ³¹Ele ahle ich terihi ishirit uje tibite orhōta uje oso ōr iluu ich mihnū heke Porrosht tyenij sepyēr ōr nehe hn tērz Satanās uje tibey nāhu irmo. ³²Uje ochowishihī yok krus eeych nehe ich nos tuu oso otirēt otir yok. ³³Uje tata shuu itsorz ich shuu imeheeych uje ire tyenij tooho krus eeych.—

³⁴Erze oso otatim Jesús otsii: —Oyunt uje Porrosht ahwoso tata uje Cristo tyenij shish de, ye tope. ¿Inaāpo heke atha ese uje tāra poōrc tyenij ochowishihī krus eeych? ¿Yeēkpo ese uje tāra poōrc?— ³⁵Jesús tatim ōr im: —Ese uje itso luu yesh de olak ahir per shi par daalo arhaabo. Tyenij erkihilo asa luu yokōrt uje yesh chihit olak pork deeych yet nehe ich dihlele. Uje yeēk dirk uje dihlak ich ye diraha uje tīr. ³⁶Ese uje itso luu uje ehn chihit olak ye otislo ire par uje amsahalo par ir aabo heke ich olak shi itso luu pork erahalo uje ich ūru.— Uje Jesús tata shuu itsorz hn hno sakis ire.

³⁷Shiyokorīhi kuche ōr ile ikich ich kihniya uje ye latik pwele niyokōr per shish otsotiis ire ³⁸par uje nos yakaha erze uje profeta Isaías lishi chichewkite. Ir ahwoso shuu itsorz im: —Irhiche, nos oso otsotiis ahwoso uje titim ōr. Ye latik diraha uje ahakōr erze kuche ēra akirbo.— ³⁹Heke shish otsotiis pork profeta Isaías tata toy im: ⁴⁰—Porrosht shiyeru ōr ile par uje ye onomo hn ye oduhu deyuwo tisir par ochiraha, pork kimiji onomo hn odiraha ich otir Porrosht hn wichi ishi ōr hnitewihi dahir.— ⁴¹Isaías tata shuu itsorz kite pork umo Cristo uje hūre hn tatim oso uje teychim.

⁴²Isaías tatkite uje otsotiis ir ahwoso per shish israel oso ich okihniya ye olotiis Jesuspe hn ör bahuwo yewo ör itspo ye olotiispe, per erze ör bahuwo ye oduhu oso odirehepe pork otola erze fariseo. Erze fariseo ochibite uje yeëk uje ye lotiis Jesuspe ich ochiyuhu sinagoga eheth.
⁴³Erze ör bahuwo otola uje otatim yewo uje ye olotiis Jesuspe pork ma otsahmür uje oso onarim ör je uje Porrosht narim ör.

Erze írmo oso oshiyokör uje ich mihñüwo.

⁴⁴Eseekite hn Jesús sihnew lahwoso tatim ör im: —Uje yeëk ye lotiis yok ich ye lotiis Papa toy. Wichí uje shuu Tikirëtni. ⁴⁵Yeëk uje umo yok ich umo ese uje shuu Tikirëtni. ⁴⁶Yok itso luu uje Tikirëtni titër nahu írmo hn tuu ochiraha uje ich üru. Heke yeëk uje ye lotiis yok ich shi itso uje ye dakaha dihlelta ehethpe. ⁴⁷Yeëk uje chunt pahwoso hn ye nahmür niyokörpe ich ye yokpe uje tibite ir iluu orhōta. Ye tikirët petikni par uje yok tomsaha jwe par ahñüwo írmo oso. Shi tikirët pork sehe tokosim ör ikirít uje yelij nihna ire. ⁴⁸Yeëk uje sitak yok hn ye nahmür pahwosope de uje chibite orhōta uje shiyokör mihñik. Uje terihi írmo uhurc nehe ich pahwoso uje wichí chunt wir uje chibite orhōta uje shiyokör mihñik. ⁴⁹Ye shi titim olak uje tahmür. Papa uje shuu Tikirëtni wichí uje tatim yok par shuu titim olak. ⁵⁰Erze Papa ir ahwoso uje shuu titim olak shuu oso ör ikirít de uje yelij nihna ire. Erze uje titim olak wir uje Papa tatim yok par shuu titim olak.—

Jesús churhü dakile ör hnite.

13 ¹Eseekite uje ehn yahpaa terihi ese ör ahamich uje iich otsii Pascua ich Jesús chiraha uje jej terihi ishirít par tokolihi nahu írmo hn hno tîr Deych ahir. Wichí shish sahmür erze uje ye olotiis irpe uje ode nahu írmo. Sowa uje sahmür ör pork tooho örkite. ²Ich osdeyo uje dyablo chibite Judas Iscariote ir eyuwo par uje shuu chiwāha Jesús. Judas wichí Simón Iscariote ir ijít. ³Eseekite uje ehn Jesús hör otaak ich chiraha uje ir Deych chibite nos wir kuche ir hme hn chiraha uje tāra Porrosht ahir hn tyenij cheeshpo tîr Porrosht ahir nehe. ⁴Chiraha uje ire dich itsorz per shi iyehetihichis nemest wirc hn chiyuhu ese bortisht uje tuuhna hn chishew towaylt, chiyuwa laharc shuu tîr hñimich. ⁵Sanuwāha awit pankanta ichii churhü erze dakile ör hnite hn sekar chīra ese towaylt uje chiyuwa laharc.

⁶Uje toka Simón Pedro par churhü hnite hn Pedro tatim im: —Irhiche, ¿je erhü pir?— ⁷Jesús tatim im: —Ele ahle uje tiyokör ye erahape per je deeych yet nehe hn eraha.— ⁸Pedro tatim im: —Yelij tuu erhü pir.— Hn Jesús tatim im: —Uje ye uhu türhu er ich ye owa pakilakpe.— ⁹Simón Pedro tatim im: —Irhiche, ye shi erhü pir. Erhü pihme hn erhü puhuta toy.— ¹⁰Jesús tatim ire im: —Ese uje tisocho awit ich ye nesita uje

tisohopo. Shi ir hnite wir uje tyenij churhũ pork ich nos nimpyo. Olak ich nos olak nimpyo. Shi sohmira uje ye nimpyo.— ¹¹Jesús chiraha ese uje tyenij chiwãha ire heke tatim òr uje ye nos òr nimpyo.

¹²Uje Jesús nos churhũ òr hniteke hn tuuhna ese shepikitpo hn sakahachis nemest wir. Tatim òr im: —¿Je erahalo erze uje tiyokörke? ¹³Olak ebiilo yok on: “Maestro hn Irhĩche.” Ich om uje uhulo itsorz pork yok uu olak Irhĩch hn yok uu olak Maestro. ¹⁴Ich yok uu olak Irhĩch hn olak Maestro uje türhu olak hnite, heke olak tyenij erhũloye hnite. ¹⁵Erze uje tiyokörke wir par uje tokowa olak par uje ahakörlo uhulo itso uje tiyokörãha olak. ¹⁶Ich ùrpa uje titim olak. Ese uje òr yilak ye ma dichpe je ir yinsirc hnii ese uje tirètni ye ma dichpe je ese uje shuu tirèt. ¹⁷Kimiji erahalo erze uje titim olakike, ich om uje ahakörlo.

¹⁸Nos titim olak erze pahwoso per olak nohmet de uje ye titim irpe pork nos tikiraha olak nohmir nohmir uje tiihla olakni. Tiuhla olak nohmet shi par uje tuu Porrosht ahwoso yakaha uje tata shuu itsorz im: “Ese uje taakihĩ pahir ich sitak yok hn tyenij shiyokör itso uje tarãha yok hnimich chĩra derrza òrrza.” ¹⁹Ele ahle titim olak erze uje tyenij tir yok nehe, heke uje tir yok ich erahalo uje yok toköra poörzni. ²⁰Ich ùrpa uje titim olak. Uje tuu yeèk hno tãr yet hn wichi sahmür ire ich sahmür yok toy. Ese uje sahmür yok ich sahmür toy ese uje shuu Tikirètni.—

Jesús tata uje Judas sehe niwãha ire.

²¹Eseekite uje Jesús tatim òr shuu itsorz ich chuuna hn dosdarakpa heke tatim òr im: —Titim olak ich tuu ùrpa. Olak yet de uje sehe niwãha yok.— ²²Erze ir akile oteychimye. Ye odiraha yeèkpo ese uje sorzihi. ²³Wir òr yet de uje sakaha Jesús ahir. Wichi Juan uje Jesús sahmürpa. ²⁴Simón Pedro tatim Juan chĩra nahmita par shuu sapur yeèkpo uje Jesús sorzihi. ²⁵Wichi dechi Jesús ahir heke tatim im: —Irhĩche, ¿yeèkpo ese?— ²⁶Jesús tatim im: —Ese uje taka yok pan hn tokosim ire wichi ese.— Ichii sita ir pan hn ishĩm Judas. Wichi uu Simón Iscariote ir ijit. ²⁷Uje Judas chishew ese pan hn tew ich Satanás masaha ire ehèt. Jesús tatim ire im: —Ese uje sehe ahakör ich ahakör shichish.— ²⁸Nihyok uje ir akile yeèk uje sakaha nemest wir chiraha erze uje Jesús tatim Judas shuu itsorz. ²⁹Judas wichi uje tibey ese kotsirbit uje ochimchaha hnote heke erze yewo oshuu deyuwo tisĩr uje Jesús shuu tiya kuchèrk par ese òr ahamich o kimiji duhu dosim kuchèrk uu losuhlaabo. ³⁰Uje Judas chishew ese pan hn tew hn hno shichish tokole. Ich dihlak.

Jesús tatim dakile uje tyenij otsahmürye.

³¹Eseekite uje Judas tokolike hn Jesús tatim òr im: —Yok toköra poörzni. Ele ahle Porrosht shuu yok dich hn tuu ire dich toy. ³²Kimiji tuu Porrosht dich ich Porrosht shuu yok dich shichish. ³³Olak shi olak itso

pijo. Ich yej terihi pishirīt par uje tikitokolihī olak ahir. Ekulo yok nehe per shi itso uje titim erze israel osohna ich titim olak toy. Ye olak pwele etīrlo ese owich uje takaha titīr.

³⁴Titim olak pahwoso ahlo. Tyenij ahmūrloye uhulo itso yok uje tahmūr olak. Tyenij ahmūrloye uhulo itsorz. ³⁵Uje ahmūrloye uhulo itsorz ich nos wir oso uje ode ĩrmo lekityo ochiraha uje olak yok pakile.—

Jesús tata uje Pedro sata ire nehe.

³⁶Eseekite hn Simón Pedro tatim Jesús im: —Īrhīche, ¿etīr iraāpo?— Jesús tatim im: —Ese owich uje takaha titīr ye owa pwele etīrpe, per je deeych yet nehe hn etīr yok.— ³⁷Pedro tatim im: —Īrhīche, ¿inaāpo heke ye yok pwele par tokōya owa? Kimiji tikiti par takashim owa ich shi tikiti.— ³⁸Jesús tatim im: —¿Je ūru uje sehe akashim yok nehech ati? Titim owa ich tuu ūrpa. Uje ehn yahpaa kokot yerh ich atha yok tre bese uje ye eraha yokpe.—

Shi Jesús wichi dehet uje tīr Porrosht ahir.

14 ¹Eseekite hn Jesús tatim ōr im: —Ye as olak ĩbe. Ye otiislo Porrosht hn ye otiislo yok toy. ²Wahacha Papa ihyuch ich owīlo kihniya uje de. Kīrēhe ye ilorz ich ye titim olakpe uje takaha tinshii owīlo par olak. ³Uje timit nehe ich takaashpo takahi olak par uje olak dechi pahir toy. ⁴Olak erahalo ese dehet uje tīr ese owich uje titīr.— ⁵Tomás tatim Jesús im: —Īrhīche, ye oyīrahape ese uje etīr heke ye oyīraha ese dehet.— ⁶Jesús tatim ire im: —Shi yok uje tuu oso otīr Porrosht ahir shi itso uje yok dehet uje seya oso Porrosht ahir. Erze uje ich ūru tāra yok. Yok tokosim oso ōr ĩkirīt uje yelij nihna ire. Shi yok uje tuu otaachīhi Porrosht ahir. ⁷Kimiji erahalo yok ich erahalo Papa toy. Ele ahle erahalo Papa hn amlō ire.—

⁸Felipe tatim im: —Īrhīche, owa ōryok uu Eych. Shi ese uje sehe oyeychīm.— ⁹Jesús tatim im: —Felipe, ich osdeyo uje yok de olak ahir. ¿Je ye eraha yokpe? Yeēk uje umo yok ich umo Papa toy. ¿inaāpo heke atim yok par uje sehe eychīm Papa? ¹⁰¿Je otiis uje yok de Papa ehēt hn Papa de pehet? Erze pahwoso uje titim olak ye shi yokpe uje titim olak. Papa uje de pehet wichi uje shiyokōr debiyo. ¹¹Ye otiislo uje yok de Papa ehēt hn Papa de pehet. Kimiji otiislo pahwoso per ye otiislo erze uje tiyokōr uje ye latik pwele niyokōr uje chībīte orhōta uje Papa de pehet. ¹²Titim olak ich tuu ūrpa. Uje yeēk ye lotiis yok ich shiyokōr itso uje yok tiyokōr, hn shiyokōr obiyo ich ma deyo je yok pork titīr Papa ahir. ¹³Nos wir kuche uje apurlo Papa hn ěrlo piich ich tiyokōr par uje tuu Papa dich. ¹⁴Tiyokōr uje apurlo Papa hn ěrlo piich.—

Porrosht tyenij shuu Dechibich tīrēt nehe.

¹⁵Eseekite hn Jesús tatim ōr im: —Uje ahmūrlo yok ich ahakōrlo pahwoso uje titim olak. ¹⁶Tyenij tapur Papa hn shuu yet tīrēt tīr olak par

takashim olak. Wichĩ tyenij shish de olak ahir. ¹⁷Wichĩ Porrosht Ichibich uje shish tata uje ich ũru. Ye ĩrmo oso ōr pwele onahmũr irpe pork ye onomo irpe hn ye odiraha irpe. Olak erahalo ire pork dechi olak ahir hn tyenij masaha olak aho nehe.—

¹⁸Jesús tatim ōr im: —Ye tokoym olakpe tuu olak itso kuhnẽro. Tyenij takaashpo nehe. ¹⁹Shi pikaap hn erze ĩrmo oso ye onomo yokpe per olak tyenij eychimlo yokpo nehe. Tyenij yok ikpo nehe heke tyenij olak ikpo toy. ²⁰Uje terihĩ ese deeych uje yok ikpo nehe ich erahalo uje yok de Papa eheth hn olak de pehet hn yok de olak aho. ²¹Yeẽk uje chiraha pahwoso hn shiyokŕ wichĩ uje sahmũr yok. Yeẽk uje sahmũr yok shuu itsorz ich Papa sahmũr ire hn yok tahmũr ire toy. Tuu imeheeych uje yok de ire ahir.—

²²Judas ye uu Judas Iscariotepe wichĩ tatim Jesús im: —Irhĩche, ¿uhu inaãpo par uje oyomo owa hn ye erze ĩrmo oso ōr pwele onomo owape?— ²³Jesús tatim ire im: —Uje yeẽk sahmũr yok ich shiyokŕ uje pahwoso tata, hn Papa sahmũr ire. Papa hn yok tyenij oyitĩr ire hn oiyiakaha ire ahir. ²⁴Uje yeẽk ye nahmũr yok ich ye niyokŕpe uje pahwoso tata. Erze uje yesh titim olak wir ye pahwosope. Wir tãra Papa uje shuu Tikirẽtni.

²⁵Uje ehn yesh yok de olak ahir ich titim olak ahnũwo pahwoso. ²⁶Ese uje takashim olak nehe wichĩ Porrosht Ichibich uje Papa shuu tãr olak par sakaha powich. Wichĩ tyenij nos shiyokŕaha olak hn shuu olak eyucha erze kuche uje titim olakni.—

²⁷Hn Jesús tatim dakile im: —Uje takaha ich shish tuu olak aho kiis itso yok uje pehet kiis. Uje ĩrmo oso oshuu olak aho kiis ich ye ilo pe uje tuu olak aho kiis. Ye as olak ibe hn ye atililo latik. ²⁸Ich entlo uje titim olakike uje tyenij takaha hn takaashpo nehe. Kimiji ahmũrlo yok ich olak ayla uje titĩr Papa ahir pork wichĩ ma dich je yok. ²⁹Ele ahle titim olak par uje erahalo uje tyenij titĩr poŕc nehe. Uje pahwoso yakaha nehe ich ye otiislo yokpe. ³⁰Ich ye tuu pahwoso berzope uje titim olak pork Satanás tirẽt tãr yok. Wichĩ uje tibey nãhu ĩrmo. Wichĩ ye ir ukũrbĩrsh par tibey yok. ³¹Shi tiyokŕ uje Papa tatim yok heke erze ĩrmo oso ochiraha uje tahmũr Papa.— Hn Jesús tatim dakile im: —Alehetlo, yukulo.—

Jesús siteẽta ire itso uva diich.

15 ¹Eseekite hn Jesús tatim ōr im: —Shi yok itso uva diich hn Papa wichĩ uje tibey erze uva. ²Pakile wir ōr itso uke. Erze uke ĩya ese ir diich. Ese diich wichĩ yok. Kimiji ee ye chihĩpe ich Papa chekshehe per kimiji ir ee de ich shi chekshehe erze uje ye ompe par uje shuu ma ee kihniya. ³Erze pahwoso uje titim olakni shuu amsahalo par olak Porrosht aabo. ⁴Meylo yok hn yok itspo shish tokŕya olak. Erze uke uje ye tẽyhi ir diich ich yelij pohna per kimiji tẽyhi ir diich ich pohna hn ir ee de. Olak itspo kimiji ye meylo yok ich ye olak pwele uje ahakŕlo pĩbiyope.

⁵Shi yok itso diich hn olak itso uke. Yeëk uje shish ñya yok ich yok shish tokōya ire. Heke wichi itso pohir uje ir ee kihniya. Kimiji ye meylo yok ich ye olak pwele ahakōrlo latik. ⁶Uje yeëk iim yok ich wichi shi itso diich uke uje ðhyo hn ochibite ejwert par uje kako hn otāra ochibite jwekita hn otsēru. ⁷Kimiji shish meylo yok hn ahakōrlo uje titim olak ich olak pwele apurlo uje sehe uhulo tiyokōr ich tiyokōr par olak. ⁸Uje ahakōrlo uje titim olak ich shi olak itso pohir uje ir ee kihniya heke ich uhulo Papa dich hn uhulo imeheeych uje olak yok pakile pisho.

⁹Yok ich tahmūr olak tuu itso uje Papa sahmūr yok. Shish ahmūrlo yok uhulo itso uje tahmūr olak. ¹⁰Kimiji ahakōrlo uje pahwoso tata ich shish yahmūrloye itso uje yok tiyokōr uje Papa tatim yok hn shish oyahmūrye. ¹¹Ahnūwo pahwoso uje titim olakike par uje shuu olak ayla itso uje yok ayla heke ich olak ayipa.— ¹²Hn Jesús tatim òr im: —Sehe tuu ahmūrloye itso yok uje tahmūr olak. ¹³Uje yeëk sahmūr pishi nahyēro ich takashim òr nehech kimiji tooho par òr ire. ¹⁴Kimiji ahakōrlo uje titim olak ich olak yok pihyēro. ¹⁵Ele ahle ich ye tikibii olakpe too pilo pork erze uje òr yilo ye odiraha uje òr yinsirc shiyokōr per shi tikibii olak too pihyēro pork nos tuu erahalo erze kuche uje Papa tatim yok. ¹⁶Olak ye aahlilo yok petikni. Shi yok uje tihla olak hn tokosim olak pibiyo par uje bolilo animirāhalo pahwoso. Tahmūr uje olak ibiyo tokole om hn shish bale itso uu pohir uje ee kihniya de heke nos wir kuche uje apurlo Papa ěrlo piich ich ishim olak.

Erze ĩrmo oso ich otsitak Jesús heke otsitak ir akile toy.

¹⁷Titim olak uje shish tyenij ahmūrloye. ¹⁸Uje ĩrmo oso oditak olak ich olak eyucha uje wir otsitak yok wapni. ¹⁹Kimiji shi olak ilo ahnūwo ĩrmo oso ich wir otsahmūr olak pork otsahmūr erze uje òr eyuwo itso òr, per tihla olakni par uje ye olak ilo òr heke ahnūwo ĩrmo oso ich otsitak olak. ²⁰Olak eyucha erze pahwoso uje titim olakike tuu itsorz too: “Yeëk uje òr yilak ye ma dichpe je nensirc.” Kimiji oloter yok ich oloter olak toy. Kimiji oniyokōr uje titim òr ich oshiyokōr uje atimlo òr toy. ²¹Nos tyenij oshiyokōr ĩhi olak erze kuche mihñūwo pork ye otiislo yokpe. Oshiyokōr oshuu itsorz pork wir ye odirehepe ese uje shuu Tikirētni. ²²Kirēhe ye Tikirētni ich ye titim òr uje òr iluu mihñū ich ye oditak yokpe per ele ahle ye òr pwelpe uje otsata uje oshiyokōr mihñūwo. ²³Yeëk uje sitak yok ich sitak Papa toy. ²⁴Kimiji ye tiyokōrni erze kuche uje ye latik pwele shiyokōr ich ye tuu imeheeych uje òr iluu mihñū, per oteychim uje tiyokōrni heke otsitak yok hn otsitak Papa toy. ²⁵Wir otsitak yok oshuu itsorz heke oshuu yakaha uje Porrosht ahwoso tata uje de òr ahir. Tata shuu itsorz im: “Ye tiyokōr latik per shi otsitak yok.” ²⁶Deeych yet nehe hn tirēt ese uje takashim olak. Wichi Porrosht Ichibich. Shish tata uje ich ũru. Tāra Dii Porrosht. Wichi tyenij shuu imeheeych uje pahwoso ich ũru,

27hn olak tyenij uhulo imeheeych toy uje pahwoso ich ũru pork wapni ichii olak de pahir uje tanimirāha Porrosht ahwoso.—

16 ¹Hn Jesús tatim ōr im: —Nos titim olak ahnūwo kuche par uje erahalo heke uje erze mihñūwo tīr olak nehe ich ye ahakōrlo mihñūwo. ²Tyenij ochiyuhu olakihi sinagoga ehēt. Deeych yet nehe hn yewo oshuu olak oshuu atilo. Uje oshiyokōr oshuu itsorz ich ōr eyuwo tīšr uje oshiyokōr Porrosht ibiyo. ³Tyenij oshiyokōr oshuu itsorz pork ye odīraha Dii Porroshtpe hn ye odīraha yokpe. ⁴Titim olak ahnūwo par uje erahalo heke uje erze mihñūwo tīr olak nehe ich olak eyucha uje titim olakni. Wapni ye titim olakpe pork shish yok de olak ahir, ⁵per ele ahle takaha tīfīr ese uje shuu Tikirētni. Ye olak yeēk tatim yok uje takaha tīfīr iraāpo. ⁶Uje titim olak uje takaha ich shuu olak dosdarakpa, ⁷per ich ũru uje tyenij titim olak. Ich ma om uje takaha pork kimiji ye takaha ich Porrosht Ichībich uje tyenij takashim olak ye tīrēt tīr olakpe, per uje takaha ich tuu tīrēt tīr olak. ⁸Uje wichi tīrēt nehe ich shuu īrmo oso ochuuna uje oshiyokōr mihñūwo, hn shuu ochīraha uje Porrosht sahmūr uje tiyokōr. Wichi tyenij shuu ochīraha uje ōr hñitew de Porrosht ahir heke tyenij ofīr urhuta bahluta ehēt nehe. ⁹Porrosht Ichībich shuu ochuuna uje oshiyokōr mihñūwo pork otsotiis yok ¹⁰hn shuu ochīraha uje Porrosht sahmūr erze uje tiyokōr pork tīfīr ire hn ich ye amlo yokpe. ¹¹Porrosht Ichībich tyenij shuu ochīraha uje tyenij ofīr urhuta bahluta ehēt nehe pork Satanás uje tībey īrmo tyenij tīr wahacha toy.

¹²Kuche de ich kihniya uje sehe titim olak per ele ahle ye titim olakpe pork ye olak eyuwo dishpe. ¹³Uje Porrosht Ichībich taācha nehe wichi nos tyenij shuu erahalo uje ich ũru, pork ye tatim olak kuchepe uje shi tāra ir eyuwo. Shi tatim olak uje ire chunt uje Porrosht tata hn shuu erahalo erze kuche uje tyenij tīr īrmo nehe. ¹⁴Wichi tyenij narim yok nehe hn tatim olak pahwoso uje titim olakni. ¹⁵Nos wir Dii Porrosht ukurbo de yok, heke titim olakike uje Porrosht Ichībich tyenij tatim olak nos wir pahwoso par shuu erahalo. ¹⁶Ich yej terihi uje ye amlo yokpe per je deeych yet nehe hn amlo yokpo.—

Jesús akile ich ōr dosdarak uje tyenij toy per tyenij ōr ayla uje ire ikpo.

¹⁷Eseekite hn ir akile yewo otatimye otsii: —¿Duhu inaāpoko erze uje tata im: “Yej terihi uje ye amlo yok per je deeych yet nehe hn amlo yokpo?” ¿Duhu inaāpo uje tata im: “Tīfīr Papa ahir?” ¹⁸¿Duhu inaāpo erze uje tata im: “Yej terihi?” Ye oyīraha uje tata.—

¹⁹Jesús chīraha uje sehe otatim ire heke tatim ōr im: —¿Je ekitkerloyeēhe erze pahwoso uje titim olak too: “Yej terihi ishirīt hn ye amlo yokpe hn deeych yet nehe hn amlo yokpo?” ²⁰Titim olak ich tuu ũrpa. Olak tyenij eyerhlo hn olak dosdarak per erze īrmo oso ich ōr ayla. Wap ich olak dosdarak per ich uhurc nehe ich olak aylpa. ²¹Uje

timcharrza ir ijit tabita ich chuuna uje ich dospa pork ich yej terihi ishirit par uje ir ijit shurha, per uje shurha ich chikey ir dosiryo. Ich ayla uje ir ijit shurehe lika irmo. ²²Shi olak itso wate pork yej terihi ishirit par olak dosdarak per tyenij takachim olakpo heke ich olak ayipa. Nihyok yeek pwele sontew uje olak ayla nehe.— ²³Hn Jesus tatim or im: —Uje terihi ese deeych uje amlo yokpo nehe ich nihyok olak yeek uje tatim yok kuchit par uje sehe erahalo. Titim olak ich tuu urpa. Kimiji apurlo Dii Porrosht kuchit erlo piich ich ishim olak. ²⁴Nehech ele ahle yelij apurlo Porrosht kuche erlo piich. Uje apurlo ich ishim olak par uje shuu olak ayipa.

²⁵Ahnüwo kuche uje titim olakike shi titeeta. Deeych yet nehe hn titim olak ich ye titeetape. Titim olak Dii Porrosht ich tuu imeheeych. ²⁶Uje terihi ese deeych uje apurlo Porrosht kuchit erlo piich ich ishim olak. Ye nesita uje titim Dii Porrosht par uje ishim olak. ²⁷Dii Porrosht tyenij ishim olak nehe pork wichi sahmür olak pork ahmürlo yok hn ye otiislope uje tokora ire. ²⁸Tikitolih Dii Porrosht ahirni hn tikiret titir nahu irmo. Deeych yet nehe hn tikitolih nahu irmo hn titir Dii Porrosht ahirpo.—

²⁹Ir akile otatim otsii: —Ahnüwo ahwoso uje atim oryokike ich imeheeych. Ye eteeta latik. ³⁰Ele ahle ich nos oyiraha uje eraha kuche, pork uje ehn yahpaa oso olapur owa kuchit ich nos eraha or eyuwo. Heke ye oyotiispe uje ara Porrosht.—

³¹Jesus tatim or im: —Atimlo yokike uje ye otiislo yokpe. ³²Per ele ahle ich yej terihi ishirit uje moymlo yok hn olak karêhe lekityo etirlo owilo par akahalo. Uje olak karêhe lekityo ich ye yok nohmirape. Dii Porrosht de pahir. ³³Ich titim olak ahnüwo kuche par uje tuu olak aho kiis. Ahnüwo irmo oso tyenij oloter olak per tyenij olak ayila pork terz Satanás uje tibey nahu irmo.—

Jesús orar par ir akile.

17 ¹Eseekite uje Jesús nos tatim or erze kuche hn teychim poorc orar sapur Porrosht im: —Papa, ich terihi ishirit par uje tikiti. Sehe tuu uhu yok dich par uje tuu owa dich toy. ²Asim yok pukurboni hn uhu yok ma dich je nos wir oso par tokosim or ikirit uje yelij nihna ire erze uje asim or yokni. ³Ese or ikirit uje yelij nihna ire wichi uje ochiraha owa hn ochiraha yok. Shi owa Porrosht pisht uje ich uru. Ochiraha uje yok Cristo hn ochiraha uje owa uje uhu Tikiretni. ⁴Yok tuu owa dichih nahu irmo, hn nos timit erze uje asim yokni par tiyokor. ⁵Papa, ele ahle sehe tuu uhu yok dichih ahir itso uje wapni pork uje ehn yahpaa irmo chihikite ich yok dich itso owa.

⁶Erze oso uje asim or yokni ich tuu ochiraha owa. Wir ode nahu irmo per ye or ilo irmo osope. Wir uje aahla orkrite hn asim or yok hn oshiyokor

uje ahwoso tata. ⁷Ele ahle ich ochiraha nos wir kuche uje asim yok shi tāra owa. ⁸Erze ahwoso uje atim yok ich titim ör hn wir otsahmür. Ochiraha uje ich ūru uje tokōra owa hn ye olotiispe uje owa uje uhu Tikirētni. ⁹Yok orar tapur owa par ör ire. Ye tapur owa par erze ĩrmo osope. Shi tapur par erze uje asim ör yokni pork wir uje aahla örkite. ¹⁰Nos wir uje aahla örkite wir par yok hn wir par owa toy. Wir uje oshuu yok dich. ¹¹Ye shish tiyakaha nāhu irmōpe per erze uje aahla örkite wir tyenij otsakaha. Papa, yelij ahakōr uje mihñüwo. Ele ahle takaha titir owa. Erze uje asim ör yokni sehe tuu shish abey ör ēra akirbo par uje shish ör eyuwo ilye itso owa hn yok. ¹²Uje ehn yok de ör ahir ich tikibey ör tīra akirbo uje asim yok. Nihyok ör yeek uje iim yok. Shi Judas wichī sohmirā uje iim yok, hn ir owich de urhuta bahluta ehēt. Ese uje shiyokorīhi yok shuu ahwoso yakaha. ¹³Ele ahle ich yej terihi uje takaashpo titir owa, per uje ehn yesh yok de lika ĩrmo ich yok orar titim owa par uje tuu ör aylpa itso yok. ¹⁴Titim ör ahwosni per ĩrmo oso ich otsitak ör pork wir ye ör ilo erze ĩrmo osope hn yok itspo ye yok ilo örpe. ¹⁵Ye tapur owape par uje eyuhu orīhi ĩrmo ehēt. Shi sehe tuu abey ör par uje ye Satanás nehnyēr ör. ¹⁶Wir ye ör ilo erze ĩrmo osope hn yok itspo ye yok ilo erze ĩrmo osope. ¹⁷Uhu pakile ör iluu om ēra owa ahwoso. Ahwoso ich ūru. ¹⁸Shi itso yok uje uhu Tikirētni titir nāhu ĩrmo ich yok tuu otir ĩrmo lekitiyo. ¹⁹Tibite yok par uje tiyokōr uje ahmür heke takashim ör par uje ochiraha ahwoso uje ich ūru heke ochibite ire par uje oshiyokōr uje ahmür.

²⁰Yok orar tapur owa ye shi par uje akashim erze uje ode pahir. Yok orar tapur owa par erze yewo uje deeych yet nehe hn ye olotiis yok uje ochunt ör ahwoso. ²¹Tapur owa par uje uhu nos ör eyuwo ilye shi itso uje owa de pehet hn yok de ehēt par uje wir ode eyok aho toy. Uje ör eyuwo ilye ich erze ĩrmo oso ye olotiispe uje owa uhu Tikirētni. ²²Erze obiyo ihirtso uje asim yokni ich tokosim ör par uje shuu ör eyuwo itsye shi itso eyok uje eyok eyuwo itsye. ²³Yok de wir ör aho hn owa de pehet par uje ör eyuwo itsye heke erze ĩrmo oso ochiraha uje owa uje uhu Tikirētni hn ahmür erze uje ye olotiis yokpe itso uje ahmür yok.

²⁴Papa, erze uje asim ör yokni ich tahmür uje ode pahir par uje oteychim uje uhu yok dich. Uje ehn yahpaa ĩrmo chihikite ich uhu yok dich pork ahmür yok. ²⁵Papa, yelij ehnyēr yeek. Shish yakaha uje ata. Erze ĩrmo oso ye odiraha owape per yok tikiraha owa hn erze uje ye olotiis yok ochiraha uje uhu Tikirētni. ²⁶Yok tuu ochiraha owani hn shish ma tuu ochiraha owa par uje wir otsahmürye itso uje ahmür yok hn yok de ör aho toy.—

Ochishew Jesús.

18 ¹Eseekite uje Jesús sihna orar hn hōr dakile otokolihichis ohno ochikāha ese kojach ohwit uje iich otsii Cedrón. Shakirra dechi

pit uje shi pohir olivo wir uje de. Jesús hōr dakile otīr asa shakirra ehēt. ²Judas uje chiwāha Jesús chiraha ese owich pork shish Jesús hōr dakile otīrichis. ³Erze saserdote ōr bahluwo hn erze fariseo oshuu ohyerptoso ohno ōya Judas hn oshuu wir sohmīramo ohno toy erze uje otibey templo. Ohnoy kuche par uje oteye hn ohnoy nampyon. Otōhwa piyo uje hūre itso nampyon.

⁴Jesús nos chiraha erze kuche uje tyenij tīr ire heke tīr ōr hn tatim ōr im: —¿Ekulo yeēkpo?— ⁵Otatim otsii: —Oyukwi Jesús uu dit Nazaret osht.— Tatim ōr im: —Yok.— Judas uje chiwāha ire dechi ōr ahir. ⁶Uje Jesús tatim ōr im: —Yok— ich nos odale latsike hn ōr kay. ⁷Jesús tatim ōr im: —¿Ekulo yeēkpo?— Hn otatimpo otsii: —Oyukwi Jesús uu dit Nazaret osht.— ⁸Jesús tatim ōrpo im: —Titim olakike uje yok. Uje shi ekulo yok ich moymlō erze yewo shi odo.— ⁹Jesús tata shuu itsorz par uje shuu yakaha erze uje tatim Porroshtike im: —Erze uje asim ōr yokni ich nīhyok yeēk uje pyerte.—

¹⁰Simón Pedro ir espada de. Chiyuhu hn ihyo ese saserdote ōr bahlut pisht ir yilt huta. Naha hn ihyo ārza waāchta. Ir iich otsii Malco. ¹¹Jesús tatim Pedro im: —Ehmer ese owa espada. Uje Dii Porrosht duhu ese kuche tīr yok ich tyenij tīr yok shi itso uje ishīm yok kuchērk uje ich chiyok par tokoho, ich tyenij tokoho.—

Ohnoy Jesús otseya Anás ikich.

¹²Eseekite hn erze ohyerptoso hn uu ōr bahlut hn erze uje otibey templo ochishew Jesús hn oshiyeru meyko. ¹³Wap ohnoy otseya Anás ihyuch. Ir lasēt iich otsii Caifás. Ese Caifás wichi uu israel oso ōr saserdote ōr bahlut pisht ese āyt. ¹⁴Ese Caifás wichi uje tatim erze israel oso ōr bahluwo im: —Ma om uje hnakirbich nohmet tooho erze oso je uje nos dit oso tyenij otoy.—

Pedro sata uje ye diraha Jesuspe.

¹⁵Eseekite hn Simón Pedro iyehe Jesús nēr. Jesús akilt yet iyehe nēr toy. Ese saserdote ōr bahlut pisht chiraha ese Jesús akilt yet heke iya Jesús masaha ese saserdote patikit ehēt toy ¹⁶per Pedro ye masaha ehēte. Shi iyehe patikit uhurra ejwert heke Jesús akilt yet uje saserdote ōr bahlut pisht chiraha wichi hno cheeshpo sapur asa waa je tibey uhurra par shuu sitsēr hn Pedro masaha ehēt. ¹⁷Asa timcharrza waa je tibey uhurra tatim Pedro im: —¿Je owa ese hnakirbich ir akilak toy?— Pedro tatim im: —Ye yokpe.— ¹⁸Ich hmemit kiis heke erze uje ochishew obiyohochis hn erze uje otibey templo ochukuta jwekita otsēru pichure par uje otorha. Pedro dechi ōr ahir torha asa jwekita toy.

¹⁹Eseekite hn ese saserdote ōr bahlut pisht keytkēr Jesús sehe diraha ir akile hn sehe diraha latikpo uje shiyokorāha oso. ²⁰Jesús tatim im: —Nos

wir oso ochiraha erze uje tiyokorāha ōr. Shish tiyokorāha ōr sinagoga aho hn tiyokorāha ōr templo patikit eheto uje nos israel oso otakisho lawich. Yelij tiyokorāha pakile kinaha hn erze oso yewo kinaha. ²¹ ¿Īnaāpo heke atim yok erze uje tiyokorāha oso? Atim erze uje tiyokorāha ōr par uje wir otatim olak. Wir ochiraha uje tiyokorāha ōr.— ²² Uje Jesús tata shuu itsorz hn ese uje tibey templo sepyēr Jesús uurza chīra nahmta im: —Ye ompe uje atim ese saserdote ōr bahlut pisht uhu itsorz.— ²³ Jesús tatim im: —Kīmiji titim uje mīhnik ich atim yok o kīmiji ye titim uje mīhnik ¿Īnaāpo heke tuk yok?— ²⁴ Anās shuu ohnoypo otseya Caifás. Wichī uu saserdote ōr bahlut pisht. Jesús shish hmeyko tēhiye uje oshiyeruku.

Pedro satapo uje ye diraha Jesuspe.

²⁵ Eseekite hn Simón Pedro shish de wir ōr ahir uje otorha jwekita. Otatim otsii: —¿Je owa ese hnakirbich akilak toy?— Pedro sata im: —Ye yokpe.— ²⁶ Ese saserdote ōr bahlut pisht ir yilt de uje wichī ir iis ese uje Pedro ihyo ārzaka. Tatim Pedro im: —¿Je owa uje tokomo owaka Mēya ese hnakirbichihi wahacha shakirra eheto?— ²⁷ Pedro satapo ichii kokit yerh.

Ohnoy Jesús otseya Pilato ikich.

²⁸ Eseekite uje dechole lekitiyo poro hn ochiyuhu Jesusihī Caifás ihyuch ohnoy otseya Pilato ihyuch. Ye ōr pwele omasaha ihyuchpe pork ōr ley tata kīmiji omasaha dihipit kinēhēt ir ihyuch ich oshiyokōr mīhnik heke ye ōr pwele otew erze oposo uje oshiyokōr par ese ōr ahamich uje iich otsii Pascua. ²⁹ Heke Pilato tokolihi lahuch eheto hn keytkēr ōr im: —¿Niyokōr latikpo ele hnakirbich?— ³⁰ Otatim otsii: —Kīmiji ye niyokōr mīhnik ich ye oyōhwape oyeya owa.—

³¹ Pilato tatim ōr im: —Boylo epiyerlo itso uje olak ley tata.— Otatim Pilato otsii: —Olak ley ye dosim ōryok par uje oyuhu yeēk oyuhu tooho krus eeych.— ³² Uje erze oso otata oshuu itsorz ich Jesús ahwoso yakaha uje tata uje tyenij tooho krus eeych.

³³ Pilato masaha dahuch eheto. Shuu ohyerptosht tōhwa Jesús hn tatim im: —¿Je owa uu israel oso ōr rey?— ³⁴ Jesús tatim im: —¿Erze ahwoso je atim yok je tāra owa o je tāra yeēk uje tatim owa par shuu atim yok?— ³⁵ Pilato tatim im: —Ye yok israelyape. Erze ahnapso hn erze saserdote ōr bahluwo wir uje otōhwa owa otseya owa lika. ¿Ahakōr latikpohna?—

³⁶ Jesús tatim im: —Yok rey per ye par ahnūwo irmōpe. Kirēhe yok reyihī lika ĩrmo ich erze uje otsorza yok oteye par uje ye yeēk dosim yok erze israel oso, per ye yok reyihī ele irmōpe.— ³⁷ Pilato tatim im: —¿Je owa rey?— Jesús tatim im: —Ich ūru uje atim yok. Yok rey. Tikirēt tītīr nāhu ĩrmōni par uje titim ōr uje ich ūru, hn yok shūrha par uje titim ōr

itsorz. Nos wir erze uje otsahmūr erze uje ich ūru ich otēr yok.— ³⁸Pilato tatim im: —Ye latik chīhi uje ūru.— Uje tata shuu itsorz hn hno tokole keytkēr erze israel oso im: —Ye tish latik uje mīhnik uje ele hnakirbich shiyokōr, ³⁹per shi olak iluu uje terihi ese olak ahamich Pascua ich uhulo tiyuhu yet karsel ehēt. ¿Je ahmūrlo uje tiyuhu ese uje otsii israel oso ōr rey?— ⁴⁰Nos otibichpo otsii: —Ye oyahmūr ese hnakirbichpe. Ma om uje eyuhu Barrabás.— Ese Barrabás wichi echikit.

19 ¹Eseekite hn Pilato ishim Jesús erze ohyerptoso par shuu otsepyēr ochīra shikote. ²Erze ohyerptoso oshiyokōr Jesús wolt ochīra wonti hn ochimchaha huta oshuu iyāha oshuu itso uje rey iyāha korona hn oshuu iyāha nanerpta uje kolor lila itso rey ōr nerpi. ³Otsitir ire hn otsihnew lahwošo oloter ire otsii: —Liki uu israel oso ōr rey. Uhu ikirīt ma berzak,— hn oshuu ile.

⁴Eseekite hn Pilato tokolihi lahuch ehētpo tatim ōr im: —Hmeychimlo, tokōhwa teya olak ikich par tuu erahalo uje ye tish latik uje mīhnik uje ele hnakirbich shiyokōr.— ⁵Jesús tokolihi Pilato ihyuch ich iyāha ese wolt uje oshiyokōrke ochīra wonti hn iyāha nanerpta uje kolor lila. Pilato tatim ōr im: —Hmeychimlo ele hnakirbich.— ⁶Erze saserdote ōr bahluwo hn erze uje otibey templo uje omo Jesús ichii otsihnew lahwošo otsii: —Owishīhi krus eeych. Owishīhi krus eeych.— Pilato tatim ōr im: —Boylo owishīhilo krus eeych. Yok ye tishpe uje mīhnik uje wichi shiyokōr.— ⁷Erze israel oso ōr bahluwo otatim otsii: —Ōryok ley tata uje tyenij oshuu oshuu toy pork wichi chibite uje ire Porrosht Ijit.—

⁸Uje Pilato chunt uje oshuu itsorz ich ma tola. ⁹Hno masaha lahuch ehētpo. Tatim Jesús im: —¿Owa āra irāāpo?— Per Jesús ye diilehetpe. ¹⁰Heke Pilato tatim ire im: —¿Ināāpo heke ye ekitkēr yokpe? ¿Je ye eraha uje pukurbo de par uje tiyuhu owa hn pukurbo depo par uje tuu ochowish owa ochibite krus eeych?— ¹¹Jesús tatim im: —Nihyok ye akirbirsh par ahakōr kucherkīhi yok kimiji Porrosht ye dosim owa. Heke erze uje oshim yok owa ma oshiyokōr uje mīhnūwo je owa.—

¹²Uje Pilato chunt uje tata shuu itsorz ichii chukwi Jesús iluu par uje sehe diyuhu ire. Per erze israel oso otatim Pilato lahwošo ich otsihnew otsii: —Kimiji eyuhu ese hnakirbich par uje hno ich ye wichi ahērakpe ese rey Cesar. Uje sehe yeēk dii ir reyīhi ich wichi ir imāha rey Cesar.— ¹³Uje Pilato chunt ōr ahwošo ich shuu ochiyuhu Jesús pwert ehēt hn sakaha ese owich uje de ejwert uje jwe sakaha. Ese owich hebreo ahwošt im Gabata uje tata piso uje oshiyokōr ochīra kojano po. ¹⁴Ese deeych wichi uje oso oshiyokōr oposo par ese ōr ahamich dechole uje iich otsii Pascua. Ich terihi deeych pehet hn Pilato tatim erze israel oso im: —Hmeychimlo ele olak rey Jesús.—

¹⁵Per ōr ire otsihnew lahwošo otsii: —Tuk uhu toy. Tuk uhu toy. Owishīhi krus eeych.— Pilato tatim ōr im: —¿Je sehe uhulo towishīhi

krus eeych ele olak rey?— Erze saserdote òr bahluwo otatim otsii: — Nìhyok ye òryok rey kinehètíkish, shì rey Cesar nohmira.— ¹⁶Heke Pilato ishìm Jesús erze ohyerptoso par uje shuu ohnoy ochowishihi krus eeych.

Ochowishihi Jesús krus eeych.

¹⁷Eseekite hn erze ohyerptoso oshuu Jesús tokolihi pwert ehèt shì ihyòk ir krus. Ohnoy ire otseya ese owich uje iich otsii huta debiyo. Hebreo ahwosht otsii Gólgota. Wichì uu israel oso òr ahwosht.

¹⁸Ochowishihi wahacha krus eeych. Ochowish yewo toy òr osiyer ochibite òr krus eeyo toy. Yet de Jesús pít hn yet de pít yet. Jesús de òr ehèt. ¹⁹Pilato chichew lahwooso chibite tabilt uje tata uje Jesús wichì dit Nazaret osht hn wichì uu israel oso òr rey. Ochibite ese tabilt Jesús ir krus eeych. ²⁰Erze israel oso ich okihniya uje òr ler erze uje Pilato chicheku pork ese owich uje ochowishihi Jesús ye dukuhlehe ese ditpe. Erze uje Pilato chicheku chîra israel oso òr ahwoso. Erze òr ahwoso iich otsii hebreo, hn chîra romano oso òr ahwoso. Erze òr ahwoso iich otsii latín, hn chîra griego oso òr ahwoso. ²¹Erze saserdote òr bahluwo otatim Pilato otsii: —Ye ebite uu israel oso òr rey. Shì ebite uje wichì tata uje ire israel oso òr rey.— ²²Pilato tatim òr im: —Erze uje ticheku ich yuwirke. Ye tuu kinähape.—

²³Uje erze ohyerptoso ochowishihi Jesús krus eeychike ichii otsehek ir ishüwo oshuu po kwatro. Kal nohmira shì hnoy pít. Per waa nerpta yata wate shì tii ire. Ye o dichewpe ²⁴heke erze ohyerptoso okeytkêrye otsii: —Ye ompe uje yeheklo. Ma om uje yoterlo kuchit. Uje serz ich wate par ire.— Uje oshiyokòr oshuu itsorz ich oshuu Porrosht ahwoso yakaha uje tata im: —Otsehek pishuwo par òr ire hn oloter kuchit par uje yeëk chiyey ich hnoy asa pyèrpta waa je de eeych.— Heke erze ohyerptoso oshiyokòr oshuu itsorz. ²⁵Jesús data shì iyehetihì wahacha ye dukuhlehe ese kruspe, hn María nanimicha dechi toy. María waa Cleofas ir irähtha dechi toy, hn María Magdalena dechi toy. ²⁶Uje Jesús umo data uje dechi hn ese ir akilt uje ich sahmürpa dechi toy ich tatim data im: —Mama, hmeychim wichì shì itso eyjit uje de ahir.— ²⁷Tatim ese dakilt im: —Hmeychim, abey wate uhu itso uje wate ata.— Uje Jesús tata shuu itsorz ichii ese ir akilt hnoy seya dahuch.

Jesús toy.

²⁸Eseekite hn Jesús chîraha uje ich yej terihì ir uhurc heke tata im: —Piich sèhi yok.— Erze ahwoso shuu Porrosht ahwoso yakaha. ²⁹Jarta dechi uje wint de ehèt uje chiyok. Yeëk sitehe ponjit ese wint hn chiyuwa phich uje iich otsii hisopo hn seem par uje shuu Jesús ihì. ³⁰Uje Jesús ihì ese wint hn tata im: —Ich timit pibiyoko.— Chiwa dele hnimich hn ishìm Porrosht dechibich ich toki.

Ohyerptosht chichew Jesús arzibich chîra asôrza.

³¹Eseekite uje ochibite Jesús krus eeych wichi uu deeych uje oshiyokôr oposo par deychole pork deychole ich terihi ese òr ahamich uje iich otsii Pascua. Heke erze israel oso òr bahuwo ye onahmürpe uje erze tre ode ir krus eeyo nehech terihi deychole. Ohno otsapur Pilato par uje ochobirho wir òr dile o kimiji òr itero debiyo erze uje ode ir krus eeyo par uje ochirmas òr hn ochiyuhu orîhichis. ³²Heke erze ohyerptoso ohno hn ochobirho wichi debiyo ese webich osht uje de ir krus eeych hn ochobirho wichi debiyo ese yet toy uje de Jesús pit. ³³Uje otsitîr ire Jesús ich omo uje toki heke ye odobirho ir itero debiyo. ³⁴Ohyerptosht yet chichew arzibich chîra asôrza ichii armista tokole hn awit îya. ³⁵Yok Juan. Takachim erze hn tiita hn pahwoso ich ûru. Tikiraha erze uje tiita ich ûru hn titim olak par uje ye otiislo. ³⁶Erze kuche uje tokolkite shi par uje shuu Porrosht ahwoso yakaha. Ir ahwoso tata uje ye olobirho ir lebiyope hnii nohmira. ³⁷Porrosht ahwoso tata toy im: —Tyenij oteychim ire uje ochichew.—

Ochihitsim Jesús.

³⁸Eseekite hn hnakirbich târa dit Arimatea uje iich otsii José. Wichi Jesús akilak toy per ye dibite ire orhõtape par uje ye odîraha pork tola erze israel oso òr bahuwo. Hno tîr Pilato sapur Jesús yûhurrza hn Pilato ishîm ire. Heke hnoy Jesús ir yûhurrza. ³⁹Hnakirbich yet de uje iich otsii Nicodemo. Wichi takashîm José. Wichi uje dihla kni hn tekîrihi Jesús. Tôhwa kuche uje aat ehmuuj iich otsii mirra hn áloe. Erze áloe wir kinêhe, wir pohir isho. Erze kuche uje aat ehmuuj wir iyuwe treynta kilo. ⁴⁰José hn Nicodemo ochirmas Jesús yûhurrza hn ochipeësa bortisht hn ohnoy ochihitsim. Ochinsaha erze kuche uje aat ehmuuj itso uje israel oso oshiyokôr uje ochihitsim yeêk. ⁴¹Ese owich uje ochowishîhi Jesús krus eeych shakirra dechi hn dukuta de uje oshiyokôr kojach onta. Wate yesh ahle. Yahpaa odihitsimihi latik eheth. ⁴²Ochimchaha Jesús asa dukuta eheth pork ich ye dukuhlape hn ye òr tyemptikish pork yej terihi uhurc ese deeych uje oshiyokôr oposo par ese òr ahamich uje iich otsii Pascua.

Jesús ikpo.

20 ¹Eseekite uje terihi domingo dihîrbît pisht uje ehn lekîtiyo wiso hn María Magdalena hno tîr dukuta. Umo ese kojach uje otsentii asa dukuta ebich ich yeêk chiyuhu. ²Heke hno uushi tîr ese owich uje Simón Pedro de hn ese Jesús ir akilt yet uje ich sahmür dechi toy. María tatim òr im: —Ochiyuhu eyok Irhîch ir yûhurrza dukuta eheth hn ye oyiraha uje ochibite.— ³Pedro hn ese Jesús akilt yet otokolîhi pwert eheth

hn ohno otĩr asa dukuta. ⁴Wir ooshi per ese yet ma wantak je Pedro heke taachĩhi dukuta wap. ⁵Wichi sitĩr ire hnimich hn teychim dukuta eheth. Shi umo ese bortisht uje ochipeẽsa Jesús per ye masaha dukuta eheth. ⁶Uje Simón Pedro taãcha ich masaha asa dukuta eheth. Umo ese bortisht uje shi dechi ⁷hn umo ese shekipit yet uje oshiyeru irmiyohna par uje ye ahwo kãra. Ye nõya ese bortishtpe uje otsepeẽsa ire. Yeẽk chipaãsho hn chibite owich yet. ⁸Ese Jesús ir akilt yet uje taachĩhi dukuta wapike masaha eheth toy hn umo erze shekipo uje dechi hn ye lotiispe uje Jesús ikpo. ⁹Ehn yahpaa odiraha uje Porrosht ahwoso tata uje tyenij ikpo tokolihi erze topo õr ahir. ¹⁰Erze Jesús akile uje õr osiyer otokolihĩ dukuta eheth ohno ocheeshpo otĩr ese owich uje otsakahahna.

Jesús tokolihi María Magdalena ikich.

¹¹Eseekite hn María shish yerh uje iyehe dukuta ahir. Uje ehn yerh ich sitĩr ire hnimich teychim asa dukuta eheth. ¹²Umo anjele õr osiyer odechi. Õr ishewo poro hn otsakaha ese owich uje ochibite Jesushna. Yet sakaha uje ir huta dehna hn yet sakaha uje ir hnite dehna. ¹³Erze anjele otatim asa timcharrza otsii: —¿Inaãpo heke eyerh?— Tatim õr im: —Ohnoy Pinsirc hn ye tikiraha uje ochibite.— ¹⁴Uje tatim õr shuu itsorz somtis ire hn umo Jesús uje iyehe nõr per ye direhepe uje wichi Jesús.

¹⁵Jesús tatim asa timcharrza im: —¿Inaãpo heke eyerh? ¿Ekwi yeẽkpo?— Wate sërza uje ire ese uje tibey shakirra heke wate tatim im: —Irhĩche, kimiji owa uje boy ire ich owa yok iraãpo uje ebithna par uje takahi.— ¹⁶Jesús tatim im: —María.— Wate somtis ire. Seõt hebreo ahwosht uje tata im: —Rabuni.— Ese ahwosht tata maestro. ¹⁷Jesús tatim im: —Ye akihir yok pork yahpaa titir Papape. Bo etir erze pishibo. Atim õr uje titir Papa hn wichi uu olak Deych toy. Wichi uu yok Irhĩch Porrosht hn olak Irhĩch Porrosht toy.—

Jesús tokolihi dakile õr ikich.

¹⁸Eseekite hn María Magdalena hno tĩr erze Jesús ir akile hn tatim õr im: —Tukumo eyok Irhĩchĩke,— hn tatim õr toy uje wichi tatim ireke. ¹⁹Shiyehe wichi domingo dihak hn erze ir akile otakisho lawichihĩ pwert eheth. Nos pwert uhur kutute. Oshiyeru uhur pork otola erze israel oso õr bahluwo. Jesús shi tokolihi ese pwert eheth hn iyehetihĩ erze dakile õr eheth hn tatim õr im: —Uhu olak aho kiis.— ²⁰Uje tatim õr shuu itsorz hn sowa õr nahme obilo hn sowa õr larzibich obich heke õr ayla pork omo uu ir Irhĩch. ²¹Hn Jesús tatim õrpo im: —Uhu olak aho kiis. Itso uje Papa shuu Tikirẽtni ich yok tuu etirlo lekitiyo toy.— ²²Uje tatim õr shuu itsorz hn tibichu õr tatim õr im: —Sehe tuu Porrosht Ichibich masaha olak aho. ²³Uje olak perdonar yeẽk ich Porrosht perdonar ire toy. Per kimiji ye olak perdonar yeẽk ich erze kuche mihñuwo uje shiyokõr shish de ire.—

Tomás umo uje Jesús ikpo.

²⁴Eseekite hn Tomás wichi Jesús akilak toy uje ör dose. Ir alokot otsii Arãho. Ire ye chihi ör ahirpe uje Jesús tokolihi ör ahirhna. ²⁵Jesús akile yewo otatim otsii: —Oyumo eyok Irhîchhna.— Per Tomás tatim ör im: —Kimiji ye takachim ir hme obilo hn ye tiyuwa pihmta erze obilo uje ochiwa klabo hn kimiji ye tiyuwa pihme ir arzibich obich ich shish tokotiis.—

²⁶Eseekite uje terihi daalo osho hn Jesús akile otakasho lawichihi pwert eheto. Ich Tomás dechi ör ahir toy. Oshiyeru pwert uhir per Jesús tokolihi ör ikich. Tatim ör im: —Uhu olak aho kiis.— ²⁷Hn tatim Tomás im: —Hmeychim pihme. Aluwa ahmita lika. Aluwa ahme parzibich. Ye ompe uje otiis uje yok ikpohna.— ²⁸Tomás tatim im: —Owa uu yok Irhîch Porrosht.— ²⁹Jesús tatim im: —Amo uje yok ikpo heke ele ahle ich ye otiis. Ich ma om par erze uje ye onomo yok per ye olotiis yokpe.—

Juan chichew ana hutita par uje ye olotiis Cristope.

³⁰Eseekite hn Jesús shiyokör yar ich kihniya erze dakile ör ikich uje ye chihi asa hutitape. ³¹Per tichew erze uje de ana hutita par erahalo uje Jesús wichi Cristo hn wichi uu Porrosht Ijît pisht. Uje ye otiislo ire ich shish olak ikirît de uje yelij nihna ire.

Jesús tokolihi dakile ör ikichpo.

21 ¹Eseekite uje ich deeych yet hn Jesús tokolihi dakile ör ikichpo asa lagunta Tiberias wirc. Uje ehn yahpaa Jesús tokolihi ör ikich ich okeytkêrye oshuu itsorz. ²Simón Pedro dechi onoota wirc hór Tomás. Uu ir alokot otsii Arãho. Natanael dechi toy. Wichi tãra dit Caná uje dechi hnimich Galilea. Zebedeo ir aabo odechi toy hn Jesús akile yewo ör osiyer odechi toy. ³Simón Pedro tatim ör im: —Takaha tesher.— Hn ör ire otatim otsii: —Oyukwîya owa oyesher toy.— Ohno oyãha pohorrza per ese dihak uje ochesher ye odihyeru latik.

⁴Uje ich taa par dechole lekitiyo poro hn Jesús tokolihi onoota wirc per erze ir akile ye odîraha uje wichi ire. ⁵Jesús tatim ör im: —Olak pijo, ¿ahirlo latikipoko?— Ör ire otatim otsii: —Ye oyiyeru latik.— ⁶Jesús tatim ör im: —Árlo ese olak ret ebîtilo pohorrza waächta hn tyenij ahirlo.— Heke oshiyokör uje tatim ör. Ich ye ör pwele odish ire ese ör ret pork doshiyo ich kihniya uje masaha eheto.

⁷Ese Jesús ir akilt yet uje ich sahmürpa tatim Pedro im: —Wichi uu eyok Irhîch.— Uje Simón Pedro chiraha uje wichi uu Irhîch hn iyãha lasuwo pork chiyuhuku par chish obiyo. Tãr irehe asa lagunta eheto hn sahn narrza tîr wirc. ⁸Erze yewo shi otsakaha pohorrza eheto. Wîr shi syen metro dukuhlehe onoot wirc, heke ochurzîhi ir ret awit pork ich doshiyo kihniya uje de eheto.

⁹Uje oyhñimichihì pohorrza ehèt hn omo jwekitihichis. Omo uje sanis loshit erze pichure eeych hn pan de Jesús ahir toy. ¹⁰Jesús tatim òr im: —Ohwālo loshiyo sohmīramo uje ahirloko.— ¹¹Simón Pedro dohir pohorrza ehèt hn chishew ese ir ret. Ihñimich hn dalihi hñimich. Ich doshiyo kihniya de ehèt uje ich deyo. Wir syento sinkwenta y tres per ese ir ret ye kārpe. ¹²Jesús tatim òr im: —Erētlo aaklo.— Nihyok ir akile yeēk uje tatim ire il: —¿Owa yeēkpo?— Nos ochiraha uje wichi uu òr Irhīch. ¹³Jesús siṭir ire asa jwekita hn chishew ese pan hn ishim òr. Ishim òr erze doshiyo toy. ¹⁴Uje Jesús ikponi ich tre bese uje tokolihi òr ikich.

Jesús keytkēr Simón Pedro.

¹⁵Eseekite uje ich nos otaakike hn Jesús tatim Simón Pedro im: —Simón, owa uu Juan ijit. ¿Je ma ahmūr pishi yok je erze?— Simón Pedro tatim im: —Ēhe Irhīche, eraha uje tahmūr owa.— Jesús tatim im: —Abey Porrosht aabo. Wir shi òr itso uu yok obeje ijaabo.— ¹⁶Hn Jesús tatimpo im: —Simón, owa uu Juan ijit. ¿Je ahmūr pishi yok?— Pedro tatim im: —Ēhe Irhīche, eraha uje tahmūr owa.— Jesús tatim im: —Abey Porrosht aabo. Wir shi òr itso uu yok obeje.— ¹⁷Ich tre bese uje tatim im: —Simón, owa uu Juan ijit. ¿Je ahmūr yok?— Pedro ich dosdarak pork ich tre bese uje tatim kimiji nahmūr ire hn Pedro tatim im: —Irhīche, owa nos eraha kuche hn eraha uje tahmūr owa.— Jesús tatimpo im: —Abey Porrosht aabo. Wir shi òr itso uu yok obeje. ¹⁸Titim owa ich tuu ūrpa. Uje ehn owa ijaap ich anāha asuwo hn etir uje ahmūr, per uje owa ilaro nehe ich tyenij ēr ahmiko hn yeēk tyenij hnoy owa seya owa uje ye ahmūrpe.— ¹⁹Erze uje tatim ire shuu chiraha uje tyenij ochowishihì ire krus eeych nehe par uje oshuu ire oshuu toy. Uje toy itsorz ich shuu Porrosht dich. Hn Jesús tatim im: —Mēya yok.—

Jesús sahmūr pishi dakilt yet uje iich otsii Juan.

²⁰Eseekite uje Pedro somtis ire teychim nanēr hn umo ese Jesús akilt uje ich sahmūrpa. Wichi tirēt iyehe òr nēr. Wichi uje de Jesús ahirni uje otaak hn tatim im: —Irhīche, ¿yeēkpo ese uje sehe niwāha owa?— ²¹Uje Pedro umo Juan uje iyehe òr nēr hn tatim Jesús im: —Irhīche, ¿latik tokolihi ire uje toy nehe?— ²²Jesús tatim im: —Kimiji tahmūr uje wichi shi ika nehech takaashpo nehe ich ye jukur par eraha. Shi Mēya yok.— ²³Uje Porrosht aabo uje ode lekityo ochunt uje Jesús tatim Pedro shuu itsorz hn otata uje ese Jesús akilt yet ich ye tope, per Jesús ye tata duhu ilorzpe. Shi tata im: —Uje takaashpo nehe kimiji tahmūr ich shish wichi ika. Ye jukur uje eraha.—

²⁴Yok wichi ese Jesús ir akilt. Nos tiita erze kuche hn nos tichew tibite ana hutita. Yirahalo uje tiita uje ich ūru. ²⁵Kuche kihniya de uje Jesús shiyokōrni uje ye tichewpe. Kimiji yeēk nos dichew dibite hutita erze uje Jesús shiyokōr ich tuu peyuwo tisir uje nihyok owich irmo lekityo par nos wir erze hute.